

四庫全書

史部

欽定四庫全書

史部

山西通志卷一百二十一

詳校官給事中臣王鍾健

檢討臣德生覆勘

總校官進士臣朱鈞

校對官學正臣常循

謄錄監生臣阮鍾璟

欽定四庫全書

山西通志卷一百二十

人物二十

朔平府

元

程思廉字介甫家東勝州父恒沿邊監榷規運使思廉
用薦給事東宮授樞密院監印使任襄樊轉餉築城
置倉轉輸者多與民爭門不時至今行旅異路粟至

多露積一夕大雨思廉安臥不起省中召詰答曰此去敵近中夜騷動衆必驚或致他變縱有漂濕不過軍中一日糧耳聞者避之至元十二年入為監察御史劾阿哈瑪特繫獄居之泰然累遷河南道副使關兩河饑而急徵租欲緩之有司謂法當上請思廉曰必待請民且不堪命矣即移文罷徵後果得請既而流民數萬渡河求食朝廷遣使禁勿渡思廉慮其生變曰民急就食豈得已哉天下一家河南河北皆吾

民也悉縱之往且曰雖得罪無憾章上亦不之罪衛
輝懷孟大水及城不沒者數版思廉即修隄防露宿
督役水不為患衛人德之以憂去初立雲南行臺起
為御史中丞渠長來賀意甚促思廉宣上威德使毋
自外聞者懾服雲南舊有學校力為振起始有從學
問禮者成宗初除河東山西廉訪使初下車請減太
原餉諸王駝馬數雖觸嫌怨不顧也卒得從減免諸
滋擾累民甚賴焉平陽諸郡歲轉粟北方勞費數倍

請改輸河東近倉舊法決事有議割權歸曹吏思廉
自判牘尾某當某罪吏皆束手累任風憲言事剴切
如請早建儲貳訪求賢俊辨車服議封謚養軍力定
律令皆急務也而又見義勇為剔弊除蠹不少回互
與人交有始終疾病死喪往返數百里為之經紀好
薦達人或以為好名思廉曰若避好名之嫌人不復
敢為善矣卒謚敬肅

崔彧字文卿馬邑人負才氣剛直敢言世祖器重之至

元中奉詔至江南訪求藝術還言呼圖克岱爾貪賄
貨煩擾百姓尋令鈎考樞密文牘遂拜御史中丞奏
言臺臣雖王公將相亦宜糾察近唯御史得言臣以
為臺官皆當建言至選用臺察官若繇中書必有偏
徇之弊御史宜從本臺選擇初用漢人十六員今宜
增設蒙古人員從之復言時政十八事一曰開廣言
路多選正人番直上前庶免黨附壅塞之患二曰當
阿哈瑪特擅權臺臣莫敢糾其非事敗然後接踵隨聲

宜別加選用三曰樞密院定軍官賞罰多聽阿合馬
風旨宜擇長貳四曰翰苑亦頌阿合馬功德宜博訪
南北耆儒碩望以重此選五曰郝珍耿仁等雖正典
刑若是者尚多罪同罰異合次第屏除六曰貴游子
弟幼不講學得如左丞許衡教國子則人才輩出七
曰起居注所書不過奏事檢目宜擇重厚者分番上
直言動必書八曰憲曹無法可守宜早定律令九曰
近議裁冗官宜參衆議以立成規十曰乞將諸路大

小官有俸者量增無俸者特給十一日內地百姓流
移江南避賦役者已十五萬戶乞降詔招徠復業十
二日丞相安圖所進良臣悉為阿哈瑪特擯黜並當擢
用十三日簿錄奸黨貨財宜以實帑藏供歲計十四
曰大都不應設留守司宜易總管府十五日中書省
右丞二而左丞缺宜改置左十六日行省不必置丞
相平章宜止設左右丞以下十七日阿爾哈雅總制
兵民威權太盛宜罷職理算其官吏亦應轉徙他所

十八日三品以上宜引見而後授官疏入命與御史大夫伊實特穆爾議行又言江南盜賊蓬蠱起皆由拘刷水手與造海船日本之役宜姑止又江西四省軍需應量民力凡給物價必以實名募水手當從其所欲上不憚曰爾所言如射然挽弓雖可觀發矢則非是矣又言昨遣官清丈大都地畝宜革權勢兼并之弊無擾細民又言選取室女急宜停止宋文思院小口斛出入官糧無所容隱宜頒行皆從之以劾盧世

榮不可居相職忤旨下吏尋罷歸世榮敗起為集賢
大學士累拜中書右丞奏言僧格當國四年諸臣多
以賄進親舊皆授要官宜嚴加考覈凡入其黨者並
行斥逐又僧格所設衙門冗濫宜汰罷至大都高貨
戶半為僧格等所容庇徭役止累貧民宜核實均輸
自今非奉詔敢私歛民及擅役軍匠者論如法多見
施行久之復遷御史中丞奏額森喇丹穆爾實都王
巨濟皆僧格克黨莫不願食其肉請從公論罪以謝

天下命悉誅之又請自今使臣出必降詔省臺院諸
司必給印文以杜姦欺又言諸官吏受贓在朝詣御
史臺在外詣按察司自僧格許空諸司以故反覆牽
延今宜遵成憲中書省奏仍請以或為右丞世祖曰
崔或不愛於言惟可使任言責寶泉提舉張簡誣或
皆無驗簡繫獄病死成宗初乞遷他職不許曰卿若
辭避其誰抗言或居御史臺十年守正不阿人多疾
之固辭病上曰卿勉為朕少留大德二年加平章政

事卒至大元年追封鄭國公諡忠肅

崔斌字仲文馬邑人或之兄也性警敏多智慮世祖命舉漢人識治體者安圖以斌對入見陳時政得失直指面斥無所諱從幸上都帝問為治當何先斌曰致治之道在任相帝問誰可者斌以安圖史天澤對又請乞采輿論乃立馬颺言曰有旨問安童可為相否衆歡呼上悅遂以二人並為相除斌左右司郎中每論事帝前羣言終日不決者數語立判凡所獻替雖

近臣多不得與聞以此人多忌之會阿哈瑪特立制國
用司斌屢斥其姦惡至元四年出守東平南征卒奪
民席投其嬰於地以死斌馳謂主將曰未至敵境而
先殺吾民國有常刑汝亦當坐遂下其卒於獄尋遷
河南行省事奏劾右丞阿里妄冒軍數杖遣之有旨
籍兵二萬益襄樊斌奏河南戶少而調度繁多實不
堪命獲減其半改湖南行省參政圍潭州阿爾哈雅
中流矢斌挾盾先登語諸將曰潭人破膽矣若歛兵

許其降則重湖以南連城數十可傳檄定也倘縱兵
急攻使無噍類得一空城何益即遣人招諭城中爭
出降遷行省左丞召入覲從至上都上問江南治否
斌曰治安之道在得人先以江南官冗委任非人命
阿里等前往察汰今蔽不以聞是罔上也杭州地大
委寄非輕阿哈瑪特溺私愛以不肖子穆哩庫充達魯
噶齊豈量材授任之道且阿合馬先自陳乞免任其
子弟今身為平章而子若姪或為行省參政或為禮

部尚書或領將作監會同館一門悉處津要無以示天下公詔並黜之又言阿喇卜丹臺臣劾其侵欺官錢今復授江淮參政恐不厭人望上止其行復令御史臺樞密院按問汰冗員黜親黨罷權茶營田漕運諸司海內無不稱快調江淮左丞凡前蠹國漁民不法事悉加釐正阿哈瑪特慮其害已乃奏理算江淮錢穀遮留使不獲上見誣構以罪竟殺之天下訟其寃至大初追封鄭國公謚忠毅

趙世延字子敬本雍古氏居雲中北邊祖安扎爾從太祖征伐歷功為征行大元帥鎮蜀因家成都父哈斯襲兼文州吐番萬戶府達嚕噶齊世延幼喜讀書弱冠世祖召見俾習官政至元二十六年擢監察御史劾丞相僧格不法中丞趙國輔抑不上除南臺都事成宗時歷安西路總管前官壅滯三千牘至不三月剖決殆盡武宗初改四川廉訪使時蒙古軍士科差繁重而番戍往來多害人軍官或抑良為奴世延皆

除其弊又修都江堰遷西臺侍御史左丞劉深往討八百媳婦敗誅右丞阿固台當繼行世延言蠻方惟事羈縻藉使盡得其地何補於國兵宜止弗用章再上事卒罷延祐初拜參知政事署仍居右居中書二月十月遷御史中丞命平章以下送之入臺特們德爾忌之用皇太后旨出為雲南右丞帝命仍為中丞世延劾特們德爾罪惡十有三事乞補外授四川行省平章即重慶路立屯田得江津巴縣間田七百八十

頃摘軍千二百人壑之歲得粟萬餘石英宗初特們
德爾復相下之獄世延不為動左丞相拜住屢言世
延亡辜得出鐵木迭兒怒曰此左丞相罔上也帝曰
此朕意耳泰定四年復召為中書右丞詔以誣搆狀
示天下天歷初遷御史中丞用中丞崔彧故事加平
章政事許乘小車入內尋以平章政事兼翰林學士
承旨奎章閣大學士命修經世大典加封魯國公移
疾歸屢徵不起後至元二年卒年七十七謚文忠世

延歷事七朝敬歷省臺五十年為文章波瀾浩瀚一
根性理嘗較定律令彙次風憲宏綱行世

謝睦歡豐州豐縣人從太祖攻西京力戰先登連中三
矢仆城下太宗見而憐之命軍校拔其矢縛牛剖其
腸裹而納諸腹中良久乃甦誓以死報每遇敵必身
先之官至太原路金銀鐵冶達嚕噶齊

謝仲溫豐州人睦歡子豐頤庶顯聲音洪亮略涉書史
見世祖於野狐嶺命備宿衛城上都以工部提領董

其役大軍圍鄂令督將守江時軍士乏食仲溫教之
鬻魚人賴以飽中統元年擢平陽太原兩路宣撫使
二年改西京至元九年遷順德路總管時方用兵有
鬻子以償轉輸之值者仲溫出俸金贖還之十六年
為湖南宣慰使二十二年改淮東歲旱仲溫導白水
塘溉田公私賴焉大德六年卒年八十子蘭江州達
魯噶齊孫孛完承事郎冀寧等路管民提司達魯噶
齊

馬祖常字伯庸世為雍古部居靖州之天山先世事金為馬步軍指揮使子孫因以馬為氏曾祖烏呼訥憲宗命協理斷事官事奏免儒人丁立常平倉多所建白從世祖南征掌饋餉卒謚忠懿父潤同知漳州路總管府徙家光州祖常七歲知學得錢即市書十歲見燭歌燒屋解衣沃水以滅火衆說異之既長從蜀儒張頤講道儀真質疑義頤甚器之延祐初鄉會試皆舉首廷試第二授應奉翰林文字擢監察御史上

書請御正衙立朝儀使羣臣奏對之際御史執簡太
史執筆則雖有懷姦利乞官賞者不敢出諸口天子
承天繼統當極寶愛玉食之御猶審五味之宜酒醴
之供當思百拜之義又言古者建立言官非徒摘搯
百官短長照刷諸司文案蓋以拾遺補闕振舉綱維
上有關於宗社下有係乎民生禮文風俗治體所存
名爵謚贈政理斯在教化有方則善惡自別設施有
法則緩急自明重穀則農知勸定制則官有守修武

則先卹兵勤民則先察吏事欲究其本末言不憚於繁蕪因建白一十五事英宗為皇太子又請慎簡師傅時特們德爾為丞相盜觀國史率同官達爾瑪劾其十大罪仁宗震怒命解相位秦州山移言山本不動之物今而動焉由在野有當用不用之賢在官有當言不言之佞故有是異疏入大臣皆家居待罪亡何特們德爾復相左遷開平尹欲陰中之乃退居光州久之特們德爾死除翰林待制累遷禮部尚書兩

知貢舉一為讀卷官尋參議中書省事天曆中除南
臺中丞元統初召議新政賜鈔萬貫遂拜御史中丞
持憲益存大體西臺劾其僚禁酷時有酒容以苛細
不問嘗言將家子弟多驕脆有辜任使而庶民有挽
強蹶張老死草野者當建武科儲材以備非常之用
格不行尋轉樞密副使辭疾歸起行臺中丞皆不赴
卒年六十封魏郡公諡文貞嘗預修英宗實錄呈圖
大訓承華事畧又編集列后金鑑千秋記畧風憲宏

綱以進受賜優渥文宗嘗駐蹕龍虎臺應制賦詩尤
被嘆賞謂中原碩儒云陳旅曰古詩似漢魏律句入
盛唐散語得西漢之體

明

孫鏜字振遠東勝州人襲濟陽衛指揮同知朱勇薦署
指揮使正統末擢指揮僉事充右叅將從徐恭討葉
宗留敗賊金華復破之烏龍嶺景帝初召還起擢都
督僉事典三千營額森入進右都督充總兵官統京

軍一萬禦紫荊關而寇已入遂營城外寇轉至西城
鏜與大戰斬其前鋒數人逐寇北寇益兵圍鏜鏜力
戰不解高禮毛福壽來援石亨兵亦至寇乃退副楊
洪追之戰涿州深溝頗有斬獲師還仍典營務景泰
初楊洪劾鏜江淵言城下之役惟鏜戰最力乃釋之
三年冬充副總兵協郭登鎮大同鏜欲與分軍于百
戶宏侮登上以鏜故貫之名還仍典三千營英宗初
以奪門功封懷寧伯予世券天順初詔充總兵官帥

京軍往甘肅將陞辭宿朝房夜二鼓太監曹吉祥昭武伯曹欽反恭順侯吳瑾趨語鐘鐘草奏自東長安門隙投入內庭始得集兵縛吉祥守皇城諸門鐘走邀太平侯張瑾擊賊瑾不敢出倉猝復走宣武街急遣二子輔軌呼征西將士給之曰刑部囚逸獄獲者重賞衆稍聚至二千人始語之故時已黎明遂擊欽欽方攻門鐘兵追擊賊散軌斫欽中膊軌亦被殺欽竄歸拒鐘力戰至晡始定論功第一進世侯仍典三

千營贈軌百戶世襲鏜善戰而嘗賄太監金英景帝特宥之至是受將士賄解營務但掌左府憲宗初坐與牛玉婚間住尋予半祿已全給之成化七年卒贈涑國公謚武敏子輔請嗣侯吏部言奪門功例不得世傳上以鏜捕反者予之傳子至孫應爵正德中總督團營四傳至曾孫世忠萬曆中鎮守湖廣總督漕運凡二十年又三傳至孫維藩甲申三月被殺

孟周朔州人成化己酉舉人授閔鄉知縣時有疑獄閉

閻思過會蛛沿纓上命緝朱英果獲陞衢州府同知
鄭本公朔州人正德九年進士歷御史武宗末請慎選
宗室親賢者正位東宮繫天下望不報世宗初乾清
工竣進疏以規上嘉納之踰月欲加興獻帝皇號力
言不可嘉靖元年出按遼東劾罷副總兵張銘都指
揮周輔還朝論救給事中劉最被切責二年十月時
享太廟極言遣代非宜報聞三年三月將考興獻帝
且立廟禁中本公偕同官力爭謂在潛邸日則為孝

宗之姪興獻王之子臨御日則為孝宗之子興獻帝之姪可兩言決也至立廟大內實為不經夫享太廟文曰嗣皇帝獻帝之廟又當何稱奪俸三月六日席書為禮部尚書召張璉桂萼入京本公偕同官四十人連章言萼首為亂階璉再肆欺罔黃綰如鷹犬張喙旁噬黃宗明如奴隸攘臂橫行方獻夫居中內應以成夾攻之勢席春陰行間謀以收漁人之功卒之尚書之命由中而下行取之旨已罷再頒大臣因

此被逐言官由之得罪雖往日瑾彬之奸流禍不若是酷也不納已偕廷臣伏闕哭諫繫獄廷杖還職時諸御史中公言最切中尋還通政參議九年不調轉大理寺丞稍遷南京太僕少卿歸二十年言官邢如默賈準會薦詔許召用不赴卒

孫日嚴字敬倩朔州人七歲失怙事母唐以孝聞舉萬曆甲午鄉試令偃師守霸州所至有清白名己未大計以勁直失監司意左遷榆關別駕時軍興旁午日

嚴主餉事以勞瘁卒於官

畢清威遠衛人嘉靖中選貢任浙江慈谿主簿勦倭寇
歿於陣贈太僕寺丞廕一子入監讀書子孫永免二
丁仍於地方立祠祭祀

李瑾右玉人勇而多謀嘉靖中為中路叅將敵人犯西
路馳兵往救或以非汎地阻之瑾曰比肩事主何分
彼此既至奮勇力戰殺獲無算後以總兵鎮大同操
行清潔士卒中有得首功者親為露布上其事或戰

死設壇親祭之傷者亦親傳藥而於追殺失期及烽
堠失警者則用法不少貸以故廢將朱振得陰搆其
間叛卒王福勝等遂於夜半聚衆焚總兵府瑾聞變
持弓矢登門射之至天明矢盡知不免因解胄投地
曰我大將詎可死賊手遂仗刀自殺振後為總督劉
源清所誅福勝等亦皆伏辜

麻祿大同右衛人嘉靖中為大同叅將從鎮帥劉漢襲
板升大獲俺答圍右衛與副將尚表固守乘間擊斬

其部長寇為退舍辛愛東犯以宣府副總兵入衛與
子遊擊錦並有却敵功

李桂右玉人性忠義好讀書能通曉古今用兵得失嘉
靖中充遊擊將軍敵兵入桂率所部戰八角口且兒
梁諸處自辰至酉援不至桂慰勞再三勉以忠義咸
感激奮起轉戰至窰兒上力竭為敵所殺事聞贈都
督僉事立祠祀之

李柱大同右衛人為山西叅將嘉靖三十二年從總兵

李涿戰死於大蟲嶺贈都督僉事謚毅勇廕于世指
揮僉事

劉漢平魯衛人嘉靖三十九年春總兵大同右衛邊外
由土城舊城而北經二黑河一灰河歷三里餘其地
曰豐州崇山環合水草豐美大同人趙全以妖術謀
不軌事覺懼誅與其黨李自馨劉四兒丘富趙龍呂
老十猛谷王馬西川周元張彥文等投俺答割豐州
一區處之為城郭宮室開良田數千頃接東勝川因

升板築垣號曰板升板升者華言城也全等勾引入
寇所擄掠華人及叛出者俱聚板升教之製鈎竿攻
城具時俺答引衆西掠閱二年留千騎守老弱夏涉
大青山口外避暑惟全等不徙漠與巡撫李文進密
謀部分叅將王孟夏麻祿等五十三人率銳卒三千
人馳進漠與趙尙以重兵分三哨營於玉林川隘為
後繼孟夏等羸糧疾驅昧爽鼓噪奮斬八十餘人生
擒七十二人焚其宮室餘衆奔匿趙全匿墩上幾獲

之俄而戎騎大至我兵引退且前且却分哨迭還與
大兵合凡五日捷聞上大悅亟加陞賞有差

李梅平魯人世襲指揮同知中武舉累官陝西延綏叅
將以古兵法部勒軍士遇敵雙山堡謂其下曰是殆
將南牧我以孤軍與之格亦所以報國也挺刀入敵
陣下咸感激大呼乘之梅身集矢如蝟中十餘鎗以
死事聞贈後府左都督賜祭葬予于世襲指揮僉事
麻錦祿長子少從父行陣有戰功累官千總協守大同

右衛千戶魏昂亡入沙漠引寇挾取妻子錦伏甲擒之俺答圍城數突圍城卒完尋以罪奪官當事謂錦父子兄弟並敢戰曲法貸之屢遷宣府遊擊將軍以勤王功進秩一等遷大同叅將隆慶初進副總兵從趙竒出塞敗寇兵與弟貴並有保境功俺答納款招塞外人歸者甚衆萬曆五年擢山西總兵官尋改鎮宣府子承勛遼東副總兵都督僉事南京後府僉事麻富右衛人祿次于年方弱冠從父臨戎深入寇圍力

戰死

麻貴祿子由舍人積功至都指揮僉事充宣府遊擊將
軍隆慶中遷大同新平堡叅將寇大入山陰懷仁應
州與兄副將錦拒戰有功受賞萬曆初再遷大同副
總兵十年冬以都督僉事充寧夏總兵官尋徙鎮大
同頻以安邊勞蒙賜賚十九年閱視少卿曾乾亨劾
之謫戍邊明年寧夏哱拜反廷議貴健將知兵且多
畜家丁起戍中為副將總兵討賊屢攻城不克五月

哮拜以套部五百騎圍平魯堡選精卒三百間道馳
却之還攻城率遊兵主策應哮拜至北門出戰將往
勾套貴逐入城不敢復出俄蕭如薰將諸道援兵以
貴為副而李如松軍亦至攻益急套部宰僧從花馬
池西沙泮入貴迎擊挫之於石溝着力免復大入如
松迎戰張亮堡自卯迄己敵銳甚會貴兵至夾擊遂
北至賀蘭山獲首級百二十餘持示賊賊亦恟懼無
何城破賊盡平貴以功增秩予廕擢總兵官鎮守延

綏二十二年七月卜失兔深入定邊營張春并貴乘
虛搥其帳於套中斬首二百五十有奇還自寧塞復
還其零騎會寇轉掠至下馬關寧夏總兵蕭如薰不
能禦總督葉夢熊急檄貴赴援督副將蕭如蘭等連
戰曬馬臺薛家窪斬首二百三十有奇獲畜產萬五
千上為告廟宣捷進署都督同知予世廕明年勒兵
萬五千人遊擊閻逢時等出紅山為中軍叅將師以
律等出高家堡神水孤山為左軍叅將孫朝梁等出

定邊安邊平山為右軍而自以大軍當一面銜枚疾趨踰塞六十里寇莫知所防大潰俘斬四百有奇獲馬駝牛羊千五百再進秩予廕尋以病歸二十五年日本封事敗起備倭總兵官加提督盡統南北諸軍貴馳至朝鮮王京倭衆勢來逼別遣副將解生守稷山頗有斬獲倭將行長清正退會經略邢玠經理楊鎬至分兵三協貴與鎬督左右協兵專攻清正清正退保島山進圍其城明年正月二日行長來援九將

潰責貴以功贖貴復居東當清正數戰有功十一月
清正遁貴遂入崑山西浦諸路俘斬三千二百有奇
明年三月旋師進右都督于世廕三十八年鎮遼東
泰寧炒花子色特入犯伏兵敗之追北至白雲山斬
馘三百四十有奇色特復糾諸部合犯清河皆潰遂
求款邊境獲寧明年插漢虎墩兔以三萬騎入掠穆
家堡禦之敗去夏貴引病乞罷詔乘傳歸貴果毅驍
捷善用兵東征西討並著功伐先後承欽賜者七錫

世廕者六稱一時良將焉

麻承恩承詔承訓胥貴從子也承恩都督同知宣府延
綏大同總兵官更歷諸鎮以勇力聞後援遼退避納
馬八百匹免罪承詔寧夏叅將從平疇拜有功承訓
薊鎮副總兵麻氏多將才人以方鐵嶺李氏曰東李
西麻

蔚宙朔州人萬歷中任韓城縣縣丞性明敏縣多山田
數十人占業者率注一人名下當輸將時皆觀望不

冑前宙詳為區分父子兄弟各異籍完欠不以相逮
法立皆知急公不数月政聲大起後擢王府紀善

朱櫻平魯人萬曆三十七年歲貢任陝西咸陽縣縣丞
遼東左衛經歷城陷死之崇祀鄉賢

霍鏌字中明馬邑縣人教諭朝重子萬曆丙辰進士授
任邱縣知縣擢監察御史出按甘肅奉勅兼督學政
大閱比復命叙功不及厥臣又為楊左諸賢抗疏申
雪與逆璫忠賢忤矯旨削秩歸崇禎初起補原官仍

督直隸學政有疏請正人心端士習凡七款遷順天府府丞晉通政使司通政使時懷宗綜數名實鍊方以廉敏結主知遠以積勞卒先是在台中時嘗題豁本邑荒糧千餘石又以雲中歲飢請發帑金三萬兩賑濟著有虞邱案牘兩河憲檄蘭臺督學奏議兩河畿輔造士錄校士氣先錄並文集年譜諸書藏於家麻承宗右玉人貴從子為遼東副總兵天啓初西平破戰死沙嶺

周繼謨右衛貢生任遼東自在州知州死難

錢萬選右玉人崇禎初武進士累官都督僉事鎮守固
原文雅有古儒將風能不動聲色定大變時餉詘不
至有點者謀劫衆掠州庫並諸富室萬選密伺之知
已帳前卒亦預其間夜坐密室中秉兩燭親兵左右
列遽呼卒至厲聲問之卒愕然吐實因悉得首謀者
名姓次早胥筭殺之亂得不起主餉者懼累已以縱
軍誣之禡其職中外惋惜

郭之麟威遠衛人崇禎間選貢授真寧縣知縣撫士民薄賦稅以循績著時闖賊猖獗團練鄉勇教以陣法又設守禦具賊來擐甲登陴與吏民日夜守卒保孤城後攝咸陽篆遷九江府監紀同知遇變以身殉于傳芳亦以選貢累官達州知州

柳毓榮字令金朔州人父病侍湯藥衣不解帶者三年人稱柳孝子生平仗義扶危崇禎間任朔州衛掌印指揮甲申闖寇犯州境毓榮與城守事捍禦甚力城

破被執罵不絕口賊大怒以刀斷其舌然後殺之嘆其忠烈不去口

殷體信字明宇朔州人崇禎間任固原總兵驍勇起偏裨闖賊入關中郡邑多陷誓死綏以酬主知賊至督將士苦戰歿於陣關隴間言戰將者以體信為第一張名世字經宇馬邑人以拔貢選授棗強丞遷知白水尋擢府同知為督帥經畧洪承疇所器重與諸督撫爭題薦請為監紀叅軍陞薊州兵備道道大兵壓境

左右請出走名世曰吾以身許國義當與城存亡乃率衆固守城陷力戰歿於亂軍中季子啓元死之伯子體元仲子調元獲其屍以歸

史朝顯朔州人世襲副千戶闖逆陷城脅之從顯大罵不屈死一門遇害惟十二歲幼子成得免

國朝任浙江寧台總兵贈三代榮祿大夫

國朝

麻振揚右衛人麻氏顯於明所謂東李西麻者也振揚

遊擊崑之子有智畧順治元年以叅將隨 豫王征
勦潼關歷懷慶甘肅寧波象山副總兵胥有功績後
擢江南京口右路總兵軍民安之以老乞歸廕二子
振揚遇族黨有恩誼家居數載卒

霍之瑄字玉官號蒼壁馬邑縣人以歲試首卷膺貢考
授通判益下帷雒誦不輟甲午舉於鄉戊戌中式己
亥成二甲進士授柳州府推官撫士民馭犷獷寬嚴
得體祖母服闋以缺裁改授范縣知縣拊循有方蠲

俸及橐中衣飾倡士民築城不兩月功成時康熙甲
乙間也范人祠之擢中書科中書舍人請假歸歸仍
蠲二百金為馬邑甃東城焉

史成字薦章朔州人幼卓犖有大志聞人談郭汾陽狄
武襄事輒慨然太息噶爾丹構亂謁大同康總鎮願
從行間立尺寸功康竒之令隸麾下補中營把總以
遊擊遷辰州副將剿紅苗突入大小天星等寨自辰
至未生擒八人馘斬四百九十三人以竒功遷浙江

寧台總兵

賜蟒衣一襲大盜陳君元踞巢授將士方畧俾相機進勦
君元授首俘其黨吳周瞿老四王林三等置之法海
盜以平浙人至今賴之

寧武府

漢

班壹其先與楚同姓令尹子文之後也秦滅楚遷晉代
之間因以班為氏始皇末班壹避地於樓煩致馬牛

羊數千羣值漢初定與民無禁當孝惠高后時以財
雄邊出入弋臘旌旗鼓吹年百餘歲以壽終故北方
多以壹為字者

班孺壹子為任俠州郡歌之孺生長官至上谷守長生
回以茂才為長子令

班况回子舉孝廉為郎積功勞至上河農都尉大司農
奏課連最入為左曹越騎校尉成帝初女為倂行致
仕就第資累千金徙昌陵昌陵後罷大臣名家皆占

數於長安況生三子伯旂禪

北魏

賀拔企頭出陰山驍勇絕倫以良家鎮武川因家焉獻
武時以功賜爵龍城縣男為武川鎮軍主卒

賀拔度拔神武尖山人企頭之子也性果毅襲爵為武
川鎮軍主正光末沃野人破六韓拔陵反懷朔鎮將
楊鈞聞度拔名召補統軍配以一旅賊偽署王衛可
瓌徒黨尤盛攻沒武川又陷懷朔度拔父子並為賊

所虜乃與宇文肱合謀率州里豪傑珍念賢乙弗庫
根尉遲檀等招義勇襲殺可瓌朝廷嘉之未及封賞
度拔與鐵勒戰沒孝昌中追贈肆州刺史

賀拔允度拔子便弓馬有膽略度拔沒允兄弟皆奔恒
州刺史廣陽王深深敗歸介朱榮榮素聞其名待之
甚厚建義初封壽陽縣侯永安中進爵公長廣王除
開府儀同三司封燕郡王兼侍中使蠕蠕還至晉陽
屬齊神武出山東允早自結托神武以其北土之望

尤親禮之遂與允出信都中興初轉司徒領尚書令
入洛進爵王轉太尉加侍中孝武以允弟岳據關中
有重兵深相委托潛使來往及岳沒又委岳兄勝心
腹之寄神武重舊猶全護焉天平元年獵或告允引
弓擬神武乃餓殺之年四十八神武親臨哭贈太保
允三子世文世樂難陀興和末齊神武並召與諸子
同學武定中敕居定州賜田宅

賀拔勝字破胡度拔次于少有志操善左右馳射北邊

莫不推其膽畧衛可瓌圍懷朔勝時亦為軍主從度
拔鎮守既被圍經年而外援不至勝慷慨白鎮將楊
鈞請告急於大軍乃募勇敢少年得十餘騎夜潰圍
出賊追及之勝曰我賀拔破胡也賊不敢逼至朔州
見臨淮王彧詞義懇至彧許出師還復攻圍而入賊
追之射殺數人至城下大呼曰賀拔破胡與官軍至
矣城中納之鈞復遣勝出覘武川武川已陷勝馳還
懷朔亦潰父子遂為賊所虜尋而襲殺可瓌衆令勝

馳告朔州未反而度拔卒刺史費穆奇勝才略厚禮
留之委以兵事時廣陽王深在五原召為軍主以功
拜統軍又隸僕射元纂鎮恒州會朔州流人南下恒
州城人應之勝與兄允弟岳相失勝南投肆州允岳
投尔朱榮榮攻陷肆州得勝大悅曰吾得卿兄弟天
下不足定勝兄弟三人遂事榮時杜洛周據幽定葛
榮據真瀛榮曰井陘險要我之東門欲屈君鎮之如
何勝曰是所願也榮乃表勝鎮井陘榮入洛封易陽

縣伯後與元天穆北征葛榮大破之洛周餘燼韓樓
據薊城復以勝為大都督鎮中山樓讐勝威名不敢
南寇元顥入洛榮徵勝使與朱兆自破石度大破
顥軍擒其子冠受遂前驅入洛進爵真定縣公及榮
死田怡等議攻宮殿門勝止之曰吾衆旅不多何輕
爾怡乃止隨世隆至河橋遂勒所部還莊帝大悅仲
遠逼東都假驃騎大將軍東征都督率騎一千會鄭
先護討之先護置之營外人馬未得息俄而仲遠兵

至戰不利乃降節閔帝拜右衛將軍後從余朱度律
拒齊神武度律與兆不平勝與斛斯椿詣兆營和之
反為兆所執兆數之曰爾殺可瓌罪一也天柱薨後
不與世隆等俱來而東征仲遠罪二也我欲殺爾久
矣勝曰可瓌作逆勝父子誅之其功不小反以為罪
天柱被戮以君誅臣勝寧負王不負朝廷今日生死
在王但去賊密邇內構嫌隙自古迄今未有不破亡
者勝不憚死恐王失策兆乃捨之韓陵之役兆率鐵

騎陷陣出齊神武後度律懼兆陵已勒兵不進勝以
其攜貳遂以麾下降齊神武兆軍遂大敗太昌初為
領軍將軍尋除侍中孝武帝將圖齊神武拜都督荆
州刺史驃騎大將軍開府儀同三司南道大行臺尚
書左僕射勝多所克捷沔北盪為邱墟梁武帝救其
子雍州刺史續曰賀拔勝北問驍將爾宜慎之勿與
爭鋒續遂城守不敢出尋進位尚書令進爵琅琊郡
公孝武帝詔引兵赴洛至廣州而帝已入關勝還軍

南陽令府長史元穎行州事自率所部將西赴關中
進至浙陽授太保錄尚書事聞齊神武已平潼關乃
還荊州州人鄧誕執元穎齊神武遣行臺侯景大都
督高敖曹赴之勝敗中流矢奔梁在南三年梁武帝
遇之甚厚勝求還梁武帝親餞于南苑勝自是執弓
矢見鳥獸南向者皆不射之既至長安詣闕謝罪魏
帝握勝手歔欬久之曰初平西徙永嘉南渡漢晉皆
爾事乃關天非公之咎也授太師從周文帝擒竇泰

于小關攻弘農下河北擒郡守孫晏破東魏軍于沙苑追至河上與李弼別攻河東略定汾絳河橋之役勝大破東魏軍收其降卒而還及齊神武攻玉壁勝以前軍大都督從周文見齊神武旗鼓識之募敢勇三千人配勝以犯其軍勝適與神武遇連叱而字之曰賀六渾賀拔破胡必殺汝也持稍追神武數里刃垂及之神武汗流氣殆盡會勝馬為流矢所中死副騎至神武已逸去勝歎曰今日吾不執弓矢天也是

歲勝諸子在東者皆為神武所害勝憤恨大統十年卒臨終手書與周文曰勝萬里杖策歸身闕廷異望與公掃除逋寇不幸殞斃微志不申若死而有知猶望魂飛賊庭以報恩遇爾周文覽書流涕久之勝尤工武藝走馬射飛鳥十中五六周文每云諸將對敵神色皆動唯賀拔臨陣如平常真大勇也自居重任始愛墳籍招文儒討論性又通率重義輕財卒後唯有隨身兵仗及書千卷而已初勝至關中自以年位

素重見周文不拜後從宴昆明池時有雙鳧遊池中
周文授弓矢于勝曰不見公射久矣請以為歡勝射
之一發俱中因拜曰使勝得奉神武以討不庭皆如
此也周文悅恩禮日重勝亦盡誠推奉焉贈太宰錄
尚書事謚曰貞獻明帝二年配饗文帝廟廷無子以
弟岳子仲華嗣位開府儀同三司襲爵琅琊公大象
末位江陵總管

賀拔岳字阿斗泥度拔第三子少有大志愛施好士初

為太學生及長能左右馳射駢果絕人不讀兵書而暗與之合與父兄赴援懷朔賊衛可瓌在城西三百餘步岳乘城射中瓌臂賊大駭為廣陽王深帳內軍主與兄勝俱鎮恒州州陷投余朱榮為都督計事多與榮合榮嘗問計岳曰將軍士馬精強位望隆重若舉義旗伐畔匡救何往不克榮曰此真大丈夫之論也榮赴洛配甲卒二千為先驅至河陰榮欲稱尊號岳從容致諫榮尋亦自悟以定策功賜爵樊城鄉男

從破葛榮平元顥累遷左光祿大夫武衛將軍時万俟醜奴僭號榮以佖朱天光為使持節大都督雍州刺史岳為左廂大都督以侯莫陳悅為右廂大都督並為天光之副以討之赤水蜀賊兵斷路天光衆不滿二千軍次潼關天光有難色岳進破之於渭北軍容大振時醜奴圍岐州遣其大行臺尉遲菩薩僕射万俟行醜同向武功南度渭水攻柵天光遣岳率千騎赴援菩薩已克柵率步騎二萬至渭北岳以輕騎

數十與菩薩隔水交言岳稱揚國威菩薩自驕令省
事傳語應答不遜岳怒舉弓射之應弦而倒時逼暮
還岳於渭南傍水分精兵數十為一處隨地形勢置
之明日將百餘騎隔水與賊相見且並東行岳漸前
進騎隨岳而集賊不測其多少行二十許里至水淺
可濟處便馳馬東出賊謂岳走乃棄步兵南渡渭水
輕騎追岳岳東行十餘里依橫岡設伏兵以待身先
士卒急擊之賊退走岳號令所部賊下馬者皆不聽

殺賊悉投馬俄虜三千人馬亦無遺遂擒菩薩仍渡
渭北降步卒萬餘醜奴棄岐州北走安定天光方自
雍至與岳合勢宣言今氣候已熱待秋涼更圖進取
醜奴以為實分遣諸軍散營農於岐州北百里網川
使偽太尉侯伏侯元進據險立柵岳知其勢分密與
天光嚴備昧旦攻圍元進柵拔之擒元進諸柵悉降
輕騎追醜奴及于平涼之長阮一戰擒之又執蕭寶
夤於高平城以歸賊行臺万俟道洛退保牽屯岳攻

之道洛敗入隴投略陽賊帥王慶雲岳與天光度隴
至慶雲所居永洛城賊頻出城拒戰並就擒餘悉阬
之三秦河渭瓜涼鄯州咸來歸欵賊帥夏州人宿勤
明達降復叛又討擒之天光雖為元帥而岳功效居
多進封樊城縣伯尋詔都督涇州刺史進爵公天光
入洛使岳行雍州事普泰初除都督岐州刺史進清
水郡公尋加侍中給後部鼓吹進位開府儀同三司
兼尚書左僕射隴右行臺仍停高平討平隴中餘賊

二年加都督雍州刺史天光將拒齊神武岳曰莫若
且鎮關中以固根本天光不從果敗岳下隴擒天光
弟顯壽以應齊神武孝武初加關中大行臺永熙二
年孝武密令岳圖齊神武刺心血持以寄岳岳懼自
詣北境安置邊防率衆趨平涼西界布營數十里費
也頭万俟受洛干鐵勒斛律沙門解拔彌俄突紇豆
陵伊利等皆款附秦南秦河渭四州刺史又受節度
唯靈州刺史曹泥通使齊神武神武遣左丞翟嵩至

關中間岳及侯莫陳悅三年岳召悅會高平將討曹
況令悅前驅悅誘岳入營被害於幕中朝野莫不痛
惜之贈侍中太傅錄尚書事都督關中二十州諸軍
事大將軍雍州刺史謚曰武壯翟嵩復命神武下牀
鳴其頰曰除吾病者卿也何日忘之後岳部下以王
禮葬岳於雍州北石安原于緯嗣拜開府儀同三司
周保定中進爵霍國公尚周文帝女

侯深神武尖山人機警有膽畧孝明末隨杜洛周後與

妻兄念賢歸介朱榮為中軍副都督壯帝封厭次縣
子從討葛榮於滏口戰功尤多除燕州刺史時葛榮
別帥韓樓郝長等屯據薊城榮令深討樓配衆甚少
或疑之榮曰深臨機設變是其所長若總大衆未必
能用止給騎七百深遂廣張軍聲率數百騎深入樓
境去薊百餘里遇賊帥陳周馬步萬餘人大破之虜
卒五千餘還其馬杖縱令入城左右皆諫深曰我兵
少不可力戰事須為計以離隙之深度其已至遂率

騎夜進昧旦邗城門韓樓果疑降卒為內應遂遁走
追擒之賜爵為侯尋為平州刺史鎮范陽介朱榮死
太守盧文偉拒之深勒兵南向進至中山敗行臺僕
射魏蘭根元擘授儀同三司定州刺史左軍大都督
漁陽郡公節閔帝加開府永熙初除齊州刺史孝武
入關城人劉桃符等潛引汝陽王暹入據西城深出
奔會承制以深行青州事深襲高陽郡克之親率輕
騎夜趣青州城人執刺史東萊王貴平出降及樊子

鵠平以封延之為青州刺史深遂奔梁為賣漿者
所殺

念賢字蓋盧金城枹罕人父求就以大家子戍武川鎮
仍家焉賢美容質頗涉經史少遭父憂居喪有孝稱
後以破衛可瓌功除別將又以軍功封屯留縣伯從
命朱榮入洛兼尚書右僕射東道行臺進爵平恩縣
公永熙中孝武以賢為中軍北向大都督進爵安定
郡公加侍中開府儀同三司大統初拜太尉為秦州

刺史加太傅給後部鼓吹三年轉太師都督河州刺
史大將軍久之還朝兼錄尚書事後與廣陵王欣扶
風王季等同為正直侍中時行殿初成未有題目帝
詔近侍各名之莫允帝心賢乃以圓極對帝笑曰正
與朕意同河橋之役賢不力戰名頗減五年除都督
秦州刺史薨於州謚曰昭定賢於諸公皆為父黨自
周文以下咸拜敬之于華性和厚有長者風官至開
府儀同三司合州刺史

北周

宇文肱從父兄卒於代保定初追贈太傅柱國大將軍大司徒封虞國公子興嗣

宇文連幼而謹厚臨敵果毅隨父肱遇定州軍於唐河俱戰歿保定初追贈太傅柱國大將軍大司徒襲杞國公諡烈以章武公導子亮嗣

宇文什肥顓子事母孝文帝入關不能離母遂留晉陽為齊神武所害保定初追贈大將軍小冢宰襲邵國

公謚景子胄嗣

宇文胄什肥子少孤有幹畧齊以其幼下蠶室天和中
歸襲邵國公隋文帝輔政胄為滎州刺史舉兵應尉
遲迥為楊素所殺國除 北史贊當隋氏之起假天
威而服海內胄以葭葦之親據一州而叶義舉可謂
忠而能勇功業不遂悲夫

宇文導字菩薩顯次于少雄豪遷居晉陽與文帝隨賀
拔岳入關常從征伐進斬侯莫陳悅於牽屯山封饒

陽縣伯魏文帝東征留為華州刺史趙青雀于伏德
慕容思慶作亂導擒伏德斬思慶進章武邵公加侍
中文帝東征為大都督行華州刺史甚得守扞之方
及西魏軍不利東魏追至稠桑知關中有備乃退代
獨孤信為秦州刺史大都督十五州諸軍事文帝討
齊文宣又徵拜大將軍大都督二十三州諸軍事屯
咸陽軍還乃旋舊鎮尊性寬明善撫御文帝每出征
導恒居守深為吏人所附朝廷重之卒於上邽贈尚

書令謚曰孝朝議以導撫和西戎威恩顯著欲令世鎮隴右以彰厥德乃葬上邽城西無疆原華戎會葬者萬餘人悲號振野皆曰我君捨我乎負土成墳高五十餘尺周八十餘步為官司所止然後泣辭而去天和五年贈太師柱國公五子廣亮翼椿衆

宇文護字薩保顯少于幼方正有志度特為祖肱所愛文帝入關以年小不從普泰初始自晉陽至平涼時年十七文帝諸子並幼遂委以家務內外無不嚴肅

文帝歎以為類已初為都督封水池縣伯大統十三年進封中山公十五年遷大將軍拜司空文帝西巡至牽屯山遇疾召護至涇州曰吾形容若此必不濟諸子幼天下事以屬汝護涕泣奉命行至雲陽祕喪至長安綱紀內外撫循文武衆心乃定尋拜柱國諷魏以禪代事孝閔初拜大司馬封晉國公邑萬戶又拜大冢宰尋幽孝閔迎明帝立之二年拜太師賜路車冕服封于至為崇業郡公又拜雍州牧賜金石之

樂武成元年護上表歸政許之軍國大事尚委於護
又有膳部下大夫李安之謀護立武帝百官總已以
聽左右十二軍總屬相府凡徵發非護書不行護第
屯兵禁衛盛於宮闕事無巨細皆先斷後聞保定元
年為都督中外軍令五府總於天官詔同州晉國第
立德皇帝別廟使護祭焉三年詔自今詔誥及百司
文書並不得稱公名以彰殊禮先是護母閻與皇第
四姑及諸戚屬並沒齊皆被幽繫護每遣間使尋求

莫知音息至是並許還朝且請和好四年皇姑先至
齊主以護權重乃留其母以為後圖後母至舉朝慶
悅大赦天下每四時伏臘武帝率諸親戚行家人禮
稱觴上壽榮貴之極振古未聞天和二年護母卒賜
軒懸之樂六佾之舞七年三月十八日帝以玉珽擊
之踣地衛王直出斬之收護子柱國譚國公會大將
軍莒國公至崇業公靜正平公乾嘉及乾基乾光乾
蔚乾祖乾威等并其黨時護世子訓為蒲州刺史夜遣

柱國越公盛乘傳鎮蒲州徵訓及昌城公深同誅三年詔復先封謚曰蕩

宇文洛生字任俠好施愛士北州賢俊皆與之遊而才能多出其下及葛榮破鮮于修禮以為漁陽王仍領父肱餘衆時人皆呼為洛生王洛生善撫將士是以克獲常冠諸軍為爾朱榮所害保定初追贈大將軍封莒國公謚莊子菩薩為齊神武所害保定初追贈大將軍小宗伯襲爵謚穆以晉公護子至嗣

宇文測字澄鏡文帝族子高祖中山曾祖豆頹祖騏驎
父永仕魏並顯達測性沈密少篤學位司徒右長史
尚宣武女陽平公主拜駙馬都尉孝武疑齊神武詔
測詣周文密為之備還封廣川縣伯西遷進爵為公
周文為丞相以測為右長史委以軍國厯位侍中開
府儀同三司行汾州事政在簡惠頗得人和地接東
魏數相抄竊有獲其為寇者測皆命解縛引與相見
如客禮設宴放還東魏人大慙兩界遂通慶弔時論

方之羊叔子或有告測者周文怒曰測為我安邊何為間骨肉命斬之仍許測便宜從事轉行綏州事河水合突厥每來寇常預遣居人入城堡以避測至皆令安堵於要路數百處多積柴仍遠斥堠知其動靜突厥果來積柴處一時縱火突厥謂大軍至懼而遁走自是不敢復至因請置戍兵以備之卒於太子少保文帝親臨慟馬令水池公監護喪事謚曰靖測性仁恕好施與在洛陽日曾被盜竊州縣擒盜測恐坐

以死不認所失物遇赦免盜感恩請為測左右測從
孝武西遷事極狼狽盜亦從入關無異志子該嗣位
除州刺史測弟深

宇文深字奴于測弟性鯁正有器局年數歲便累石為
營布置行伍皆有軍陣之勢父永見之曰後必為名
將孝武西遷事起倉卒深時為子都督領宿衛兵撫
循所部並得入關以功賜爵長樂縣伯大統中累轉
尚書直事郎中齊神武屯蒲坂遣其將竇泰趨潼關

高敖曹圍洛州周文將襲秦諸將難之問策於深深
曰竇氏高歡驍將仗以禦侮今大軍就蒲坂歡守竇
援內外受敵取敗道也不如選輕銳潛出小關竇性
急來戰高歡持重未即救之竇可擒也迴師禦歡可
以制勝文帝喜曰是吾心也軍遂行果獲秦神武亦
退深又說帝取弘農克之謂深曰君即吾家陳平也
神武率大衆至沙苑深獨賀文帝問故曰歡撫河北
甚得衆心懸師渡河非衆所欲耻失竇氏懷諫而來

所謂忿兵一戰可擒也尋大破齊軍果如所策進爵
為侯六官建拜小吏部下大夫遷中大夫武成元年
遷幽州刺史改封安化縣公保定初除京兆尹入為
司會中大夫深少喪父事兄甚謹性多奇譎好讀兵
書居近侍每進籌策及在選曹頗有時譽從弟神舉
神慶幼孤深撫訓之義均同氣卒於位諡曰成康子
孝伯

宇文神舉文帝族子高祖普陵曾祖求男仕魏並顯達

祖金殿兗州刺史安喜縣侯父顯和少襲爵性矜嚴
頗涉經史膂力絕人能左右馳射孝武在藩早蒙眷
遇時屬多難嘗問計具陳宜杜門晦迹相時而動帝
深納焉及即位拜閣內都督封城陽縣公恩遇甚厚
所居隘陋撤殿省賜為寢室其見重如此齊神武專
政帝不自安顯和請擇善而從遂定入關策以母老
令預為計對曰忠孝不並臣不密則失身安敢預為
私計帝愴然曰卿我之王陵也遷大都督改封長廣

縣公從入關至漆水周文素聞其善射俄水旁有小
鳥顯和射中之周文笑曰我知卿工矣進位車騎大
將軍儀同三司散騎常侍卒建德三年追贈驃騎大
將軍開府儀同三司神舉早孤有夙成之量及長神
情個儻志略英贍明帝初起家中侍上士帝留意翰
林而神舉雅好篇什游幸恒從襲爵長廣縣公天和
元年累遷右宮伯中大夫進爵清河郡公建德三年
自京兆尹出為熊州刺史齊人憚其威名尋改并州

州即齊氏別都多有姦猾神舉示以威恩遠近悅服
改封武德郡公進柱國大將軍又改封東平郡公宣
政元年轉司武上大夫討平盧昌期于范陽齊黃門
侍郎盧思道亦在反中將解衣伏法神舉釋而禮之
即令草露布稽胡反寇西河與越王盛討之突厥赴
救以奇兵擊走稽胡欵服授并州總管武帝時神舉
處心腹之任王軌宇文孝伯等屢言太子之短神舉
亦頗預焉宣帝即位懼及禍懷不自安初定范陽後

威聲甚振帝忌其名兼以宿憾使人齎酖酒賜之薨於馬邑時年四十八神舉美風儀善辭令博涉經史尤工騎射臨戎對寇勇而有謀莅職當官每著聲績兼好施愛士以雄豪自居故得任兼文武聲彰外內子同嗣位至儀同大將軍

宇文慶字神慶神舉弟沈深有器局少以聰敏見知受業東觀頗涉經史既而日書足記姓名而已安能久事筆硯為腐儒業乎文州賊亂慶從征以功授都督

衛王直鎮山南引為左右慶善射有膽氣好格猛獸直壯之遷車騎大將軍儀同三司預誅宇文護進授驃騎大將軍加開府從攻河陰先登攀堞與賊短兵接中石乃墜絕而後蘇帝勞之曰卿勇可以賈人也復從拔晉州齊兵大至慶與齊王憲卒與賊窘憲挺身而遁慶退據汾橋賊爭進慶射之所中人馬必倒賊乃稍却拔高壁尅并州下信都禽高潛功並居最進大將軍封汝南郡公尋以行軍總管擊延安胡平

之歷延寧二州總管隋文為丞相以行軍總管征江
表以勞進上大將軍帝與慶有舊甚見親待令督丞
相軍事委以心腹尋加柱國開皇初拜左武衛將軍
進上柱國數年除涼州總管歲餘徵還加以優禮卒
於家子靜亂尚隋文女廣平公主位儀同安德縣公
熊州刺史先慶卒靜亂子協位右翊衛將軍宇文化
及之亂遇害

宇文蚪字樂仁代武川人驍悍有膽畧累著戰功封南

安侯行臺獨孤信引為帳內都督隨奔梁大統三年
歸闕進爵公擒竇泰復弘農及沙苑河橋之戰皆有
功又從信討梁公定破之累遷南秦州刺史驃騎大
將軍開府儀同三司蚪每經行陣必身先士卒戰無
不克後除金州刺史大將軍卒

寇洛上谷昌平人父延壽魏和乎中以良家子鎮武川
因家焉洛性明辨不拘小節賀拔岳西征從入關以
功封安鄉縣子岳為大行臺以洛為右都督侯莫陳

悅既害岳洛素為衆信乃收集將士志在復讐至原
州推洛為盟主周文至以洛為都督從討侯莫陳悅
平之拜涇州刺史大統初詔加開府進爵京兆郡公
封洛母宗為襄城郡君四年鎮東雍州五年卒於鎮
贈太尉尚書令謚曰武子和嗣明帝二年詔洛配享
文帝廟庭賜和姓若引氏改封松陽郡公

趙貴字元寶天水南安人祖仁以良家子鎮武川因家
焉貴少有節槩朱榮以為別將從討元顥有功賜

爵燕樂縣子從賀拔岳平關中累遷大都督岳為侯
莫陳悅所害貴謂其黨曰朱伯厚王修感意氣微息
尚能蹈履名節况吾等荷國士之過寧可自同衆人
從五十人詣悅詐降請收葬岳悅壯而許之還與寇
洛等奔平涼首議迎周文既至以貴為大都督領府
司馬悅平行秦州事預立魏文勲進爵為公為隴西
行臺討梁公定破之從復弘農沙苑進爵中山郡公
芒山之戰貴為左軍失律坐免官尋拜柱國大將軍

賜姓乙弗氏六官建為太保太宗伯改封南陽郡公
周孝閔踐祚遷大冢宰進封楚國公邑萬戶初貴與
獨孤信等皆與文帝等夷晉公護攝政貴自以元勳
每懷怏怏為護所害

趙善字僧慶貴從祖兄少好學美容儀沉毅有遠量
朱天光討邢杲万俟醜奴以為長史普泰初為大行
臺尚書封山北縣伯天光敗死善請收葬神武義而
許之賀拔岳總關中迎善為長史後乃從周文魏孝

武西遷改封襄城縣伯歷尚書左右僕射進爵為公
善性溫恭有器局位居端右而愈自謙退時人稱其
有公輔量大統九年從戰芒山為敵所獲卒於東魏
建德初子詢表請贈諡詔贈大將軍大都督四川諸
軍事岐州刺史諡曰敬

耿豪鉅鹿人本名令貴其先家於武川少麤獷有武藝
好以氣陵人賀拔岳西征引為帳內歸周文以武勇
見知豪亦自謂所事得主從討侯莫陳悅及迎孝武

錄前後功封平原于沙苑之戰血染甲裳盡赤周文
歎曰今貴武勇所向無前觀其甲裳足以為驗不須
更論級數也進爵為公芒山之戰豪謂所部曰大丈夫
除賊須右手拔刀左手把稍直砍直刺慎莫皺眉
畏死遂大呼獨入敵人鋒刃亂下當時咸謂豪歿俄
然奮刀而還戰數合當豪前者死傷相繼又謂左右
曰吾豈樂殺人壯士除賊不得不爾拜北雍州刺史
賜姓和稽氏進位侍中驃騎大將軍開府儀同三司

豪性悍言多不遜周文惜其驍勇每優容之豪亦自謂意氣冠羣終無所屈年四十五卒周文痛惜之子雄嗣位至大將軍

梁禦字善通其先安定人因官北邊遂家武川改姓紇且陵氏高祖俟力提從魏太武征討位揚武將軍定陽侯禦少好學進趣詳雅長好弓馬尅朱天光西討引為左右平關隴除益州刺史第一領人酋長封白水縣侯從賀拔岳鎮長安岳被害翊戴周文秦隴平

欲引兵東下雍州刺史賈顯持兩端以禦為大都督
雍州刺史領前軍先行說顯出迎遂入鎮大統元年
進爵信都縣公授尚書右僕射從復弘農破沙苑加
侍中開府儀同三司進爵廣平郡公出為東雍州刺
史為政舉大綱而已人庶稱之臨卒唯以國步未康
為恨言不及家贈太尉尚書令雍州刺史謚曰武昭
子睿

山西通志卷一百二十

欽定四庫全書

山西通志卷一百二十一

人物二十

寧武府

隋

梁睿字恃德御子少沈敏有行檢周文時以功臣子養
宮中命與諸子遊處七歲襲廣平郡公累加儀同三
司本州大中正開府改封五龍郡公渭州刺史閔帝

受禪徵為御伯出為中州刺史鎮新安齊人來寇睿
輒挫之拜大將軍以預佐命功進爵蔣國公入為司
會後從齊王憲拒齊將斛律明月於洛陽每戰有功
遷小冢宰歷數州刺史涼安二州總管俱有惠政進
位柱國隋文總百揆代王謙為益州總管行至漢川
西謙反睿不得進命睿為行軍元帥討之進至龍門
謙將趙儼秦會擁衆十萬據險為營睿令將士銜枚
出間道四面奮擊力戰破之鼓行而進轉戰連捷逼

成都謙親帥精兵五萬背城結陣睿擊敗之城降謙
將三十騎遁走執斬於市劔南悉平進位上柱國總
管如故威振西州夷獠歸附奏請略定南寧文帝以
天下始定人心不安初未之許後竟遣史萬歲討平
之因睿之策也及受禪顧待彌隆見突厥方強恐為
邊患陳鎮守策十餘事帝嘉歎之睿以周代舊臣久
居重鎮屢請入朝徵還恩眷逾厚尋謝病闔門自守
不交當時賜以板輿每有朝覲必令三衛輿上殿十

五年從至洛陽而卒謚襄子洋嗣歷嵩除二州刺史
武貴郎將大業六年詔改睿封為戴公以洋襲

侯莫陳崇字尚樂代武川人祖元以良家子鎮代武川
因家焉父興殿中將軍羽林監贈柱國太保清河郡
公崇少驍勇善騎射謹慤少言年十五隨賀拔岳與
爾朱榮征葛榮後從岳入關破赤水蜀又從岳力戰
破万俟醜奴崇與輕騎逐北至涇州長坑及之賊未
成列崇單騎入賊中於馬上生擒醜奴遂大破之封

臨涇縣侯及岳為侯莫陳悅所害崇謀迎周文帝時
原州刺史史歸為悅守周文遣崇襲歸直到城下即
據城門城內鼓譟伏兵悉起遂擒歸斬之以崇行原
州事仍從平悅別封廣武縣伯累遷儀同三司改封
彭城郡公從擒竇泰復弘農破沙苑戰河橋又別討
平稽胡累戰皆有功進柱國大將軍拜大司空周初
進封梁國公加太保歷太宗伯大司徒保定三年從
武帝幸原州時帝夜還宗私議宇文護護遣使將兵

就崇宅逼令自殺謚躁護誅改謚莊閔子芮嗣位柱國從東伐守太行道并州平授上柱國仍從平鄴拜大司馬隋大業初流嶺南

侯莫陳順代武川人少豪俠有氣度初為爾朱榮統軍普泰元年封本縣子從孝武入關順與周文帝同里閔弟崇又先在關中進彭城郡公梁公定逼河州為大都督討破之尋行河州事大統四年魏文帝東討順留鎮長安時趙青雀反王盟周惠達奉魏太子出

次渭北順於渭橋與賊戰頻破之魏文帝還執順手
曰渭橋之戰卿有殊功解所服金縷玉梁帶賜之南
岐州氐羌符安壽遂率部落一千款附改封河間郡
公六年加驃騎大將軍開府儀同三司行西夏州事
改平原郡公周初拜少師進柱國卒崇弟瓊荊州總
管上柱國封修武郡公瓊弟愷以軍功賜爵下蔡縣
男崇靈武縣侯周初轉授為開府儀同三司進公天
和中為司會中大夫建德二年為聘齊使

侯莫陳穎字遵道代人崇子也少有器量風神警發為時輩所推魏大統末以父功賜爵廣平侯累遷開府儀同三司從滕王適擊龍泉文城胡懸軍五百餘里破其三柵時詔胡厭匿良人者誅沒其妻子有人言為胡村所隱匿柱國豆盧勣將誅之穎曰未若召其渠帥以隱匿者付之令自歸首勣從之諸胡爭降附遷司武加振威中大夫隋初加上開府進昇平郡公伐陳以行軍總管從秦王俊出魯山道渡江安集歸

附再遷瀛州刺史甚有惠政後免百姓送者莫不流涕因立碑頌穎清德後拜邢州刺史仁壽中吏部尚書牛弘持節巡撫山東以穎為第一上優詔褒揚時妙簡清吏涖嶺南徵穎入朝進大將軍拜桂州總管十七州諸軍事大崇恩信人夷悅服煬帝初以兄芮事徵還後拜恒山太守時嶺南閩越多不附帝以穎為南方所信服拜南海太守卒官謚曰定子虔會知名

王德字天恩代武川人少善騎射以孝弟稱初從平元
顯賜爵同官縣子又從平万俟醜奴別封深澤縣男
與寇洛等翊戴周文除平涼郡守德雖不知書至於
斷決處分良無以過涇州所部五郡德常為最孝武
西遷進下博縣伯行東雍州事在州未幾百姓懷之
賜姓烏丸氏大統元年進爵公加車騎大將軍遷儀
同三司北雍州刺史後累有戰功加開府侍中進河
間郡公拜河州刺史羣羌率服後卒於涇州刺史謚

曰獻德性厚重廉慎言行無擇母幾年百歲後德終
子慶嗣性謹厚位開府儀同三司初德喪父貧無以
葬賣子公奴并一女以營葬事旋遭兵亂及在平涼
始得之遂名曰慶

韓果字阿六拔代武川人少驍雄善騎射賀拔岳引為
帳內後從平侯莫陳悅大統初累進爵石城公果性
強記兼有權略善伺敵虛實揣知情狀有潛匿溪谷
欲為間偵者果登高望之所疑處往必有獲由是為

虞候都督常領候騎晝夜巡察略不眠寢從平竇泰
賞真珠金帶一條又從復弘農破沙苑戰河橋並有
功歷朔安二州刺史從戰芒山除河東郡守又從破
稽胡於北山進兵窮討散其種落稽胡憚果勁捷號
為著翅人周文聞之笑曰著翅之名寧減飛將累遷
開府儀同三司進褒中郡公保定三年拜少師進柱
國天和初授華州刺史為政寬簡吏人稱之卒子明
嗣為黎州刺史與尉遲迴同謀被害

庫狄昌字持德神武人少便弓馬有膂力每以將帥自許從爾朱天光定關中又從賀拔岳征討岳被害翊戴周文從平侯莫陳悅賜爵陰盤縣子後從迎孝武復潼關改封長子縣子大統初累遷開府儀同三司進方城郡公授稍伯中大夫周初拜大將軍卒

王勇代武川人本名胡仁少雄健有膽決數從侯莫陳悅賀拔岳征討功居多拜別將周文為丞相封包信縣子從擒竇泰復弘農戰沙苑氣蓋衆軍所當必破

周文歎其勇敢賞賜特隆進爵公周軍不利唯胡仁及王文達耿令貴三人力戰軍還皆拜上州刺史令探籌取之胡仁遂得雍州賜名勇進侍中驃騎大將軍開府儀同三司恭帝元年從征蠕蠕破之進新陽郡公賜姓庫汗氏又別封永固縣伯特請迴授兄子興時人義之尋進大將軍卒子昌嗣官至大將軍

李虎隴西成紀人涼武昭王嵩之元孫祖熙為金門鎮將戍於武川因留家焉虎西魏時賜姓大野氏官至

太尉與李弼等八人佐周伐魏有功皆為柱國號八柱國家孝閔受禪虎已卒追錄其功封唐國公謚襄子昞襲隋柱國大將軍卒謚仁昞生淵於長安即唐高祖也

獨孤信雲中人本名如願祖俟尼和平中以良家子鎮武川因家焉父庫者領人酋長少雄豪有節義北州咸敬服之信美容儀善騎射正光末與賀拔度等同斬衛可瓌由是知名後為葛榮所獲信少年自修飾

服章軍中號獨孤郎及爾朱氏破葛榮以信為別將
從征韓婁匹馬挑戰擒賊漁陽王表賜周後破元顥
黨賜爵受德縣侯遷武衛將軍賀拔勝表為大都督
新野郡守與淅陽守韋孝寬政術俱美號為連璧勝
令入關撫賀拔岳餘眾魏孝武雅相委任孝武西遷
信單騎及於瀍澗孝武歎曰武衛遂能辭父母捐妻
子從我世亂識忠臣豈虛言哉進浮陽郡公為衛大
將軍都督三荊州諸軍事兼尚書右僕射東南道行

臺大都督荊州刺史東魏刺史辛纂出戰信縱兵擊
大敗之都督楊忠等前驅斬纂三荆遂定東魏又遣
高敖曹侯景奄至信率麾下奔梁後許還北時信父
母在山東梁武帝問所往答以事君無二梁武義之
大統三年至長安轉驃騎大將軍加侍中開府尋拜
領軍將軍從復弘農破沙苑改河內郡公聞父卒發
喪行服尋起為大都督入洛陽謁豫襄廣陳留並欵
附四年東魏將侯景圍洛陽信據金墉城隨方拒守

旬有餘日及周文帝至灑東景退走信為右軍戰不利六年侯景寇荊州令信出武關景退為大使慰撫三荆尋除隴右十一州大都督秦州刺史事無雍滯示以禮教勸以耕桑數年中公私富實流人願附者數萬家周文以其信著遐邇賜名信七年岷州梁公定舉兵反詔討之公定為部下所殺而子弟仍拒守信勒兵向萬年頓三交谷口詭道趨稠松嶺賊不虞信兵之至望風奔潰乘勝逐北徑至城下賊並出降

加太子太保芒山戰不利信帥散卒自後擊之齊追
騎驚擾諸軍因此得全涼州刺史宇文仲和不受代
率開府怡峰討之夜令諸將以衝梯攻其東北信親
率壯士襲其西南達明克之擒仲和拜大司馬十三
年移鎮河陽十四年進柱國大將軍錄前後功子善
封魏寧縣公穆必要縣侯藏義寧縣侯邑各一千戶
順武成縣侯陔建忠縣伯邑各五百戶又聞母卒追
贈庫者司空公母費連氏常山郡君十六年遷尚書

令拜大司馬周初遷太宗伯進衛國公邑萬戶趙貴
死晉公護逼令自盡年五十五信美風度雅有奇謀
大略周文以隴右形勝故委信鎮之既為百姓所懷
聲震鄰國侯景奔梁東魏魏收檄梁文矯稱信據隴
右不從宇文氏乃云無關西之憂欲以譎梁人也信
在秦州獵日暮馳馬入城帽微側詰旦吏人戴帽者
咸慕信而側帽焉其為隣境及士庶所重如此信長
女周明帝敬后第四女唐元貞皇后第七女隋高祖

文獻后三代皆為外戚自古以來未之有也隋初贈
太師上柱國十州諸軍事冀州刺史封趙國公邑萬
戶謚曰景庫者使持節太尉上柱國六州諸軍事定
州刺史封趙國公邑萬戶謚恭母費連氏太尉趙恭
公夫人

王盟字忤明德皇后之兄其先樂浪人六世祖波前燕
太宰祖珽魏黃門侍郎贈并州刺史樂浪公父巽伏
波將軍以良家子鎮武川因家焉正光中破六韓拔

陵攻陷諸鎮為所擁後流寓中山以積射將軍從蕭
寶夤西征隨賀拔岳禽万俟醜奴平秦隴常先登力
戰周文平侯莫陳悅除原州刺史孝武至長安封魏
昌縣公大統三年徵拜司空轉司徒迎文帝悼后於
蠕蠕加侍中遷太尉東征以留後大都督行雍州事
節度關中諸軍趙青雀之亂輔太子出頓渭北事平
進長樂郡公賜姓拓跋氏遷太保九年進位太傅加
開府儀同三司盟姿度弘雅仁而汎愛雖居師傅而

謙恭自處未嘗以勢位驕人及疾上數幸其第親問所欲十一年薨贈本官謚曰孝定

王勒字醜興盟子忠果有材幹年十七從周文入關平秦隴定關中周文嘗謂曰為將坐見成敗者上也披堅執銳者次也勒曰意欲兼之周文大笑拜散騎常侍賜爵梁甫縣公大統初為千牛備身直長領左右出入卧内小心謹厚魏文帝嘗曰王勒可謂不二心臣也沙苑之後勒以都督領禁兵居左翼被傷重卒

於行間周文深悼贈使持節太尉尚書令十州諸軍
事雍州刺史追封咸陽郡公謚曰忠武子弼襲爵尚
魏安樂公主位大都督通直散騎常侍勒弟懋字小
興盟之西征也懋幼留山東永安中始入關遂從征
伐大統初賜爵安平縣子進爵為公遷右衛將軍盟
卒懋上表辭位乞終喪制魏文不許累遷開府儀同
三司侍中左衛將軍領軍將軍溫和敬慎宿衛十餘
年未嘗有過廢帝二年除南岐州刺史賜爵安寧郡

公拜小司寇卒官子悅嗣位大將軍同州刺史改封
濟南郡公

王顯盟兄子幼敏悟沈靜少言為周文帳內都督累遷
驃騎大將軍開府儀同三司光祿卿鳳州刺史賜爵
洛邑縣公進位大將軍卒子誼字宜君少有大志便
弓馬博覽羣言閔帝時為左中侍上士晉公護執政
帝拱默無所關預有朝於帝者微不恭誼勃然進擊
之朝臣無敢不肅遷御正大夫父艱毀瘁過禮廬於

墓側負土成墳武帝即位遷內史大夫封楊國公齊
平自相州刺史徵為大內史汾州稽胡亂帝弟越王
盛譙王儉為總管竝受誼節度擊平之封一子開國
公受遺詔輔政宣帝即位憚誼剛正出為襄州總管
隋文為丞相時鄖洛多難誼分兵討之旬月皆平遣
使勞問冠蓋不絕以第五女妻其子奉孝拜大司徒
誼自以與帝有舊亦歸心焉隋受禪顧遇彌厚奉使
突厥稱旨進郢國公子奉孝卒踰年誼表請公主除

服為御史大夫楊素所劾詔不問然恩禮稍薄有告
誼謀反者帝令案其事無實賜酒釋之尋以罪賜死
賀蘭祥字盛樂其先與魏俱起有乞伏者為賀蘭莫何
弗因以為氏後有以良家子鎮武川者遂家焉父初
真少知名為鄉閭所重尚文帝姊建安長公主保定
二年追贈太傅柱國常山郡公祥年十一而孤居喪
合禮長於舅氏為周文所愛雖在戎旅博延儒生教
以書傳周文初入關祥與晉公護俱在晉陽後遣使

迎致之解褐奉朝請少有膽氣志在立功尋擢補都督從平侯莫陳悅又迎魏孝武以前後功封撫夷縣伯從擊潼關獲東魏將薛長儒攻回洛拔之拜左右直長進爵為公大統九年從戰芒山進位驃騎大將軍開府儀同三司加侍中十四年除都督荊州刺史進爵博陵郡公先是祥嘗行荊州事雖未朞月頗有惠政至是重往百姓安之漢南流人襁負至者日有千數遠近蠻夷莫不欵附祥隨機撫納咸得歡心時

盛夏亢陽境內有發塚暴骨者謂守令曰此豈仁者
為政邪命所在收葬之即日澍雨性清素時與梁通
好公私贈遺一無所受梁雍州刺史岳陽王蕭譽欽
其風素以竹屏風絺綌之屬及經史贈之祥難違其
意取付所司周文後聞之竝以賜祥十六年拜大將
軍周文以涇渭溉灌之處渠堰廢毀乃令祥修造富
平堰開渠引水東注於洛人獲其利魏廢帝二年行
華州事後改華州為同州仍以祥為刺史尋拜尚書

左僕射六官建授小司馬孝閔踐阼進位柱國大司馬晉公護執政祥與護中表少相親愛軍國之事皆與參謀誅趙貴廢閔帝祥有力焉武成初吐谷渾侵涼州郡詔祥與宇文貴討之拔洮陽洪和二城振旅而還進封涼國公薨贈太師同岐等十二州諸軍事同州刺史謚曰景有七子敬讓璨師寬知名敬少歷顯職封化隆縣侯後襲爵涼國公位柱國華州刺史讓大將軍鄭州刺史河東郡公璨開府儀同三司宣

陽郡公建德五年從於并州戰歿贈上儀同大將軍
追封清都公師尚明帝女位上儀同大將軍幽州刺
史博陵郡公寬開府儀同大將軍武始公入隋歷汴
鄭二州刺史竝著政績祥弟隆大將軍襄樂縣公隋
文與祥有舊開皇初追贈上柱國

若干惠字惠保代武川人父樹利周從魏廣陽王深征
葛榮戰歿贈冀州刺史惠以別將從賀拔岳以功封
北平縣男與寇洛趙貴翊戴周文仍從平侯莫陳悅

拜直閣將軍從擒竇泰復弘農破沙苑每先登陷陣
加侍中開府儀同三司封長樂郡公大統四年從魏
文帝東巡洛陽與齊神武戰於河橋力戰破之七年
遷領軍高仲密來附周文軍至洛陽齊神武屯於芒
山惠為右軍與中軍破之齊兵乃萃右軍軍將趙貴
等戰不利會日暮齊兵攻惠惠擊昏披靡至夜中騎
復來追惠徐下馬顧命厨人營食食訖謂左右曰
長安死此中死異乎乃建旗鳴角收軍而還齊追騎

憚惠疑有伏兵不敢逼至弘農見周文歔歔不自勝
周文壯之遷司空惠性剛質有勇力撫御將士莫不
懷恩侯景內附鎮魯陽卒於軍惠於諸將年最少事
母孝周文嘗造射堂新成與諸將燕射惠竊嘆曰親
老矣何時辦此周文即日徙堂於惠宅其見重如此
及卒為流涕喪至又臨撫馬加贈秦州刺史謚曰武烈
子鳳字達摩有識度襲長樂郡公尚周文女位開府
儀同三司大馭中大夫後錄惠功封徐國公拜柱國

宇文述字伯通代郡武川人本姓破野頭父盛周上柱國述少驍銳便弓馬周武帝時以父功拜開封大冢宰宇文護愛之領親信召為左宮伯累遷英果中大夫賜爵博陵郡公尋改濮陽隋高祖為相以行軍總管率步騎三千從韋孝寬至河陽尉迴遣將李雋攻懷州述別擊破之又擊尉淳於永樞先鋒陷陣俘馘甚眾平尉迴每戰有功超拜上柱國進褒國公賜緡三千匹開皇初拜右衛大將軍伐陳以行軍總管率

衆三萬自六合濟時韓擒虎賀若弼兩軍趣丹陽述
進據石頭以為聲援蕭巖蕭巖據東吳述領行軍總
管元契張默言等伐之水陸兼進落叢公燕榮以舟
師自海至亦受節度巖立柵晉陵城東又絕塘道而
自義興入太湖圖掩述後述進破其柵迴兵擊敗巖
斬巖司馬曹勒又前軍復陷吳州巖保包山燕榮擊
破之述進至奉公埭蕭巖陳君範以會稽降吳會悉
平賜一子開府物三千段拜安州總管晉王廣奏為

壽州刺史總管及為皇太子以述為左衛率舊令率
官第四品特進率品為第三其見重如此煬帝初拜
左衛大將軍改許國公大業三年加開府儀同三司
冬正朝會給鼓吹一部從幸榆林吐谷渾遣使請降
令述以兵屯西平之臨羌城撫納降附吐谷渾西遯
述領鷹揚郎將梁元禮張峻崔師等追至曼頭城攻拔
之斬三千餘級乘勝至赤水城復拔之其餘黨走屯邱
尼川進擊大破之獲王公尚書將軍二百人前後虜

男女四千口渾主南走雪山故地皆空上大悅明年
從西幸登燕支每為斥候渾賊復寇張掖進擊走之
還至江都宮敕與蘇威常典選舉叅預朝政述時貴
重委任與蘇威等而親愛過之言無不從勢傾朝廷
左衛將軍張瑾偶不中意輒張目叱之百寮莫敢違
忤金玉寶累積後庭曳羅綺者數百家僮千餘人皆被
服金玉寵過當時莫與為比及征高麗為扶餘道軍
將與九軍至鴨綠水乙支文德來詣營述緩縱文德

逃歸遂度水追之一日中七戰皆捷東濟薩水去平壤城三十里因山為營文德復遣使偽降述因其詐而還衆半濟賊擊後軍軍大潰不可禁止九軍敗績初軍三十萬五千人及還唯二千七百人除名為民明年從東征復官爵班師令馳驛赴河陽發諸郡兵以討楊元感元感西遊將圖關中述躡至閔鄉皇天原與來護兒列陣當其前遣屈突通以奇兵擊其後大破之遂斬元感賜物數千段復從東征至懷遠而

還卒於江都廢朝贈司徒尚書令十郡太守班劔四
十人輜輶車前後部鼓吹謚曰恭祭以太牢

後五代

周密應州神武川人事晉歷鄜延晉三鎮節度事周初
以太子太師致仕子廣仕周累功為眉州刺史入宋
從征太原累遷右屯衛大將軍

宋

高永年河東蕃官也為麟州都巡檢王瞻取青唐永年

總蕃兵為先鋒贍入邈川而宗噶爾叛永年以千騎直抵其城開省章峽路擊走叛羌結陣還青唐羌攻甚急擊走之會苗履姚雄以援師至戰溪蘭宗堡履少却永年領勁騎斷羌為二乃退復與李克保敦谷又戰乾溝單馬援矛刺羌酋巴爾濟蘇萬衆之中斬其首餘衆宵遁已而隆贊自乾溝逼鄯州永年佐贍拒守及雄棄湟鄯皆以永年殿崇寧初知岷州王厚使帥兵二萬出京關克安州堡遂至湟即知州事自皇城

副使進四方館使利州刺史為熙秦兩路兵馬都統
制將前軍駐宗嘴爾北溪實喇蘇萃精勇據高阜欲衝
官軍永年揮選鋒突陣師乘之羌大敗遂平鄯州遷
賀州團練使知其州溪賒羅撒合夏國四監軍衆逼
宣威城出禦之行三十里逢熟羌不為備羌遂執永
年以叛為多囉巴所殺探其心肝食之曰此人奪我
國使吾宗族漂流無處所不可不殺也是役也王厚
實主其事而謀策皆出永年厚忌而劾之故贈恤不

金少府人志卷一百二十一
及永年知文義范純仁嘗令贄所著書詣闕作元符隴右錄以棄湟鄯為非成功云

金

虞仲文字質夫武州寧遠人自少聰慧日記千言七歲知作詩十歲能屬文既長刻苦學問登遼進士累仕州縣以廉能稱復舉賢良方正對策優等擢起居郎史館修撰三遷至太常少卿求歸養親久之召復前職宰相薦文行第一權知制誥除中書舍人討平白

霄拜樞密直學士權翰林學士為翰林侍講學士秦
晉國王時任平章事都統降金授樞密使兼侍中封
秦國公卒年五十五謚文正天會中贈中書令正隆
改特進濮國公

白華字文舉隰州人貞祐三年進士為應奉翰林文字
正大元年累遷樞密院經歷官二年九月宋將彭義
斌由山東取邢洺磁華上奏曰北兵有事河西故我
得少寬今彭義斌招降河朔郡縣駸駸及於正定宜

及此大舉以除後患院官遣華相視彰德實擠之也
事竟不行三年五月夏全自楚州來奔十月集議和
宋上問全所以來華奏全狼狽而北止求自免無他
慮也華由是為上所知和議亦寢五年增築歸德城
擬工數百萬華往相役減工三之一六年權樞密院
判官上欲遣軍招李全華對曰李全特一猾寇耳老
狐穴塚待夜而出何足介懷臣所慮者今北方有事
未暇南圖一旦事定必來攻矣與我爭天下者此也

全何預焉今宜姑養士馬以備北方使全果有謀亦當發於北朝息兵之日當此則我易與矣事遂寢命至衛州經畫帥府及恒山公府上嘗諭曰喀齊喀豐阿拉皆武夫一語不相入便為齟齬今以汝調停之衛州之委亦前日調停之意也國制樞密院倚任者名奏事官其目曰承受聖旨曰奏事曰省院議事外又有難者曰備顧問故以華處之五月遣往邠州布哈軍期六日往復華自量日可馳三百里如期而還上曰

汝語征進必有難色今特銳於平時何也對曰向議南征今日異於平時事至此不得不一舉與其戰於近裏之平川不若戰於近邊之險隘上然之七年正月奏簽揀河南府州防城軍以今見在九十七萬無致他日資敵五月正授樞密判官八年屢遣往闕鄉二省軍五月又往桃源二省軍至宋八里莊城門而還是夜二更八里莊次將送欵九月防秋華議徑往河中一日可渡如此中得利襄漢軍馬亦當退矣布

哈意不同乃止天興元年四月併樞密院歸尚書省
書生輩妒華得君嘗以語撼之遂罷十二月遣近侍
問華請如春秋紀季入齊事起為右司郎中奏今當
直赴汝州與之一決汝州戰又不如半塗戰半塗戰
又不如出城戰所以然者我軍食力猶在馬則豆力
猶在也尋從至衛州二年三月遣往鄧會伊喇瑗以
鄧入宋後北歸

明

萬世德字伯修偏關人隆慶辛未進士幼竒穎王司寇
弇州為觀察時歎異之性豪舉初授南陽知縣遇事
迎刃解有疑難以片言折之豪猾吏皆驚歎後補元
城寶坻寶坻為畿輔近地戚里田宅多盤踞世德一
無所假借勢家雖怨亦無以難也生有膂力能騎射
又長於邊陲習地方要害防禦機宜入為兵部郎以
知兵聞遷陝西按察司僉事備兵西寧遇虜入寇躬
擐甲胄督將士禦之五戰皆捷聞副將李魁乘醉率

所部遏寇歸路為所圍急赴援寇皆驚遁以事降補
趙州知州遷山東按察司僉事備兵遼左詔仍監陝
西幕府軍事世德聞命單車就道決計出師一戰莽
刺川再戰水泉口皆大捷又以寇巢穴仰華寺中因
提兵出青海馳七晝夜擒其細作焚仰華寺而還遷
按察司副使備兵懷隆虜時時闖入邊掠我人畜世
德偵駐牧所在遣將搗其巢尋遷按察使布政司右
布政備兵如故倭奴犯朝鮮朝議於天津設開府扼

登萊旅順諸要地世德遂以邊才進職巡撫都察院
右僉都御史專理海防軍務已復經理朝鮮初至戰
於杏山破之遂集將士謀大舉命董一元等各統精
兵直逼釜山斬獲倭兵將二千四百四十餘人焚倭
舟七百餘隻獲倭糧二萬五千九百餘包招回朝鮮
難民五千六百餘口捷聞特命總督薊遼尋遷右都
御史兼兵部右侍郎總督如故一日聞虜將入寇時
世德已病矣授計諸將令各奉指揮戰汎地擒斬甚

衆世德才智膽略伯仲威寧晉溪間在薊遼以息兵
寧人為務寬大簡靜以疾卒於官

國朝

楊泰字春和偏關人順治元年選貢授江西靖安知縣
金逆之變以殉難著泰博聞強識文學有名於時而
雅重義氣起宰百里變生弁鎮獨以守土臣分當死
慷慨自誓以身殉城聞者壯之

張化樞字德敦偏關人學正鳳鳴子胚胎前光掉鞅文

壇為一時雋秀順治三年以明經訓導左衛姜逆煽亂守土吏率聞風遁化樞北向再拜而死可謂從容就義不負所學矣

楊光祖寧武人性樸直臨難不避康熙十四年以南昌遊擊駐防南豐寇率數萬人來犯統所部徑前搏戰甚力寇披靡已知無繼者糾其眾復集光祖因歿於陣後其子提督鯤總兵鵬疏稱父節得

贈如子官

澤州府

漢

陳龜字叔珍上黨涇氏人家世邊將雄於北州龜少有
志氣永建中舉孝廉五遷五原太守永和五年拜使
匈奴中郎將時左部亂龜以單于不能制下促令自
殺坐徵下獄免後再遷京兆尹時三輔強豪多侵枉
小民龜厲威嚴平理怨屈郡內大悅會羌胡寇邊桓
帝以龜世知邊俗拜為度遼將軍龜臨行上疏言前

涼州刺史祝良多所糾罰太守令長貶黜將半實應
顯異以勸功能又宜更選匈奴烏桓護羌中郎將校
尉除并涼二州今年租更寬赦罪隸埽除更始帝覺
悟乃更選幽并刺史自營郡太守都尉以下多所革
易下詔為陳將軍除并涼一年租賦以賜吏民龜旣
到職州郡重足震慄鮮卑不敢近塞省息經用歲以
億計大將軍梁冀與龜素有隙譖其沮毀國威挑取
功譽不為胡虜所畏坐徵還遂乞骸骨歸田里復徵

為尚書上疏言冀罪狀請誅之帝不省自知必為冀
所害不食七日而死西域胡夷并涼民庶咸為舉哀
弔祭其墓

晉

虞溥為鄱陽內史多惠政有白鳥來集入祀廟庭

北魏

徐招高平人少好法律仕元魏以功進爵為侯莊帝以
招為行臺左丞爾朱兆執招械送洛陽仲遠數招罪

欲斬之招曰不虧君命得罪為幸仲遠由是重之乃釋

北齊

上官顯願陽城人輔國將軍時東西割據顯願殄寇安民厥功不一帝勅儀同元雲祺營戍周壁俾世其業

北周

郭誕陵川人為并州刺史以禮訓俗孤獨荷澤豪強畏威士大夫仰其高風異政

唐

張仵澤潞將也守臨洺田悅攻之乘城固守累月糧且盡救不至仵悉召將立軍門命女出徧拜曰諸君戰良苦吾無貲為賞願以是女賣直為衆士一日費士皆哭曰請死戰會馬燧擊悅城下敗之仵乘勝出戰無不一當百以功遷泗州刺史居州十年擢右金吾衛大將軍未拜卒贈尚書右僕射

趙景澤州人累官工部尚書天祐末致政歸田述世系

以明宗廣建置以處族歷五代紛爭卒免其禍人服其先見云

宋

段思恭澤州晉城人曾祖約定州司戶祖昶神山令父希堯晉祖辟太原從事與桑維翰同幕府後至棣州刺史兼權鹽礬制置使思恭蔭署鎮國軍官天福中解官侍養入貢改國子四門博士賜緋開運初出為華商等州觀察支使劉繼勳辟同州掌書記繼勳入

朝會遼入汴軍士請為帥思恭諭以禍福拒弗從乃止漢祖授左補闕隱帝時蝗言望令諸州速決重刑無致淹濫必召和氣從之歷度支駕部周顯德中定濱州田賦世宗嘉之賜金紫服闋拜左司員外郎建隆二年除開封令遷金部郎中乾德初平蜀通判眉州時餘黨攻逼州城刺史趙廷進將奔嘉州思恭止之率屯兵與賊戰彭山募先登厚賞諸軍賈勇大敗賊矯詔以上供錢帛給之後度支請按其罪太祖憐

其果幹不許令知州事母憂起為考功郎中知泗州會馮繼業自靈州舉宗來朝上以思恭代知州事仍語之曰馮繼業言靈州非衛霍名將鎮撫之不可汝其往哉思恭曰臣奉詔而往必能治之上壯之賜窄衣金帶錢二百萬仍令別齎金幣以遺諸部思恭綏撫夷落訪求民病悉條奏免之俄而回鶻使入貢遣吏市硃砂吏與競思恭械其使數日贖之自是數年回鶻不復朝貢久之遷右諫議大夫知揚州兼沿江

巡檢坐與通判訐貶太常少卿改知宿州太宗初遷
將作監知秦州坐事貶少府少監知邢州太平興國
六年遷少府監雍熙元年復舊官再為右諫議大夫
二年知壽州端拱初遷給事中尋知陝州淳化三年
卒年七十三思恭踐更吏事所至著勤績子惟一太
常博士三司度支判官從子惟幾第進士兵部員外
郎

張廷翰澤州陵川人初為親校從漢祖入汴補內殿直

遷東西班軍使周初改護聖指揮使從平淮甸再遷
鐵騎右第二軍殿前散都頭都虞候宋初權鐵騎左
第二軍都校領開州刺史從平揚州以功遷控鶴左
廂都指揮使領果州團練使尋轉龍捷左廂領春州
伐蜀為歸州路行營馬軍都指揮使隨劉廷讓師次
夔州頓兵白帝廟西蜀將武守謙拒戰逆擊敗之於
猪頭鋪拔其城授侍衛馬步軍都虞候領彰國軍節
度使開寶二年疾駕親臨問卒年五十三贈侍中

何漢滎陽城人深於韜略端拱中為殿前承旨充澤州
太行路巡檢所到接下若無官然每恨不識文字常
於馬上使人讀孝經咸平中契丹屢侵河北漢滎為
先鋒屢擒渠魁敗之王超守定有尾大不掉之勢楊
延釗扼於高陽關漢滎實與其謀乾興元年充山東
山西都巡檢天聖中遷如京使安撫都監迨去任終
於覃懷傳舍享年七十二歲火屍歸骨明道二年葬
本縣城西北詳見進賢山長王虞碑記

張維則高平人幼修飾不苟同流俗試大理寺直驍騎尉以直諒聞中外受知於上景祐四年提典五房公事歷主客司郎中知晉州軍事入謝賜紫衣金魚袋王獻可澤州人官至英州刺史知瀘州黃庭堅謫涪獻可遇之甚厚子霽崇寧中為詳議官上書告蔡京罪黥隸海島欽宗復其官從种師中戰死

王雲字子飛澤州人獻可子舉進士從使高麗撰鷄林志以進擢秘書省校書郎出知簡州遷陝西轉運副

使宣和中從童貫宣撫幕入為兵部員外郎起居中書舍人靖康元年以給事中使斡里雅布軍還罷為徽猷閣待制知唐州召拜刑部尚書再出使還復以資政殿學士為康王副次磁州民譟而殺之王乃南還相州建炎初贈觀文殿學士

王忠植太行義士紹興九年取石州等十一郡授武功大夫華州觀察統制河東忠義軍馬遂知代州尋為建寧軍承宣使龍神衛四廂都指揮使河東經略安

撫使明年金圍慶陽川陝宣撫副使胡世將檄忠植以所部赴陝西行次延安叛將趙惟清執忠植使拜詔忠植曰本朝詔則拜金國詔則不拜惟清械詣薩里罕不能屈使甲士引詣慶陽城下諭使降忠植大呼曰我河東步佛山忠義人也為金人所執使來招降願將士勿負朝廷堅守城壁忠植即死城下薩里罕怒詰之忠植披襟大呼曰當速殺我遂遇害贈奉國軍節度使開府儀同三司官其將十人

王友直高平人幼從父佐遊志復中原聞金主亮渝盟
乃結豪傑謂之曰權所以濟事權歸守正何害於理
即矯制自稱河北等路安撫制置使以其徒王任為
副使徧諭州縣勤王未幾得衆數萬制為十三軍置
統制等官以統之進攻大名一鼓而克撫定衆庶諭
以紹興年號遣人入朝奏事未幾自壽春來歸詔以
為忠義都統制

段保高平人當宋行講武之制以騎射異等拜爵屢捍

邊閩嚴號令繕甲兵築城壘修屯田遇征討則備前
驅授景陵衛指揮副使子孫世襲

都貺陵川人舉進士官至鴻臚卿每朝帝虛已咨問貺
據經而對多見嘉納拜梓州轉運提押西川四十五
州多著美績兄嚮及姪嘉猷皆舉進士

都嘉猷陵川人以明經舉進士任信德知縣有惠政民
愛之如父母轉南京路兵馬都總管多偉績進天水
開國子食邑五百戶賜紫金魚袋

金

張奕字彥微澤州高平人以廕補官仕齊為歸德府通判齊國廢偵知有兵二萬在郡將謀為亂約夜半舉燎相應預選市丁校兵結陣要巷開小南門以示生路亂不得作比明亡匿略盡擒首惡誅之會都統完顏魯捕兵至欲根株餘黨奕保以闔門遂止承制除同知歸德尹事天眷元年以河南與宋改同知沂州防禦使事三年復取河南授汴京副留守歷陳秦二

州防禦使同知太原尹晉寧軍報夏人侵界詔往征之至境按籍各歸所侵土而還奏言折氏世守麟府以抗夏人本朝有其地遂以與夏夏人平折氏丘瓏戮其屍折氏怨入骨髓而不得報今復使守晉寧故激怒夏人使為鼠侵而條上其罪欲開邊釁以雪私仇耳今獨可徙折氏他郡則夏人自安朝廷從之移折氏守青州正隆間同知西京留守事遷河東北路轉運使大定三年徵為戶部尚書甫視事得疾卒

張堃沁水人天眷間經義進士歷榆次陽城繁峙解縣
令操履練達留心撫字卓有政聲終朝請大夫車騎
都尉

李曼高平人森長子幼以能賦稱大定三年登第任隰
州軍事判官政尚平易號稱循良

李仲略字簡之晏子聰敏力學登大定十九年詞賦進
士第調五臺主簿母服闋轉韓州軍事判官遷晉城
令補尚書省令史除翰林修撰兼太常博士改授左

司都事為夏讀冊官還權領左司嘗奏事退上顧謂侍臣曰仲略精神明健如俊鵬脫帽又曰李仲略健吏也尋轉員外郎特授澤州刺史以便侍父疾先是晏領沁南軍節度使澤於懷為支郡父子相繼鄉人榮之父喪免起為戶部郎中奏曰凡救其末不若正其本所謂本者厚風俗去冗食養財用而已厚風俗在乎立制度禁奢僭去冗食在乎寵力農抑游惰養財用在乎廣儲蓄時歛散商賈不通難得之貨工匠

不作無用之器則下知重本下知重本則末息矣又
條陳制度之宜上嘉納之俄授翰林直學士兼前職
命充經義讀卷官上問曰有司謂經義不若詞賦罷
之何如奏曰經乃聖人之書明經所以適用非詞賦
比乞自今以經義進士為考試官庶得碩學之士上
可其奏改吏部郎中遷侍郎兼翼王傅俄兼宛王傅
時知大興府事赫舍哩執中坐贓命鞫之罪當削解
權要競言太重奏曰教化之行自近者始京師四方

之則郡縣守令無慮數百此而不懲何以勵後况執中允殘狠愎慢上虐下豈可宥之上曰卿言是也授山東東西路按察使尋以病訪醫泰和五年卒上聞之歎曰此人於國家宣力多矣何遽至是耶贈朝列大夫謚襄獻仲略有父風剛介特立不阿權貴臨事無留滯所任以幹濟稱云

郭侯字伯有澤州人登大定二十二年進士調長子主簿萊州觀察判官萊陽縣令補尚書省令史知管差

除進大理司直母憂起復太常博士左司都事御史
臺舉侯才幹可用詔升一等遷平陽府治中久之召
為同知登聞鼓院兼秘書丞遷禮部郎中滕州刺史
同知正定府事上言每季合注巡尉官吏刑兩部斟
酌盜賊多寡處選注詔議行之改中都西京按察副
使遷國子祭酒泰和六年伐宋充宣差山東安撫副
使七年改山東宣撫副使大安中遷遼東按察轉運
使改中都路都轉運使泰定軍節度使陝西東路按

察轉運使貞祐三年罷按察司仍充本路轉運使行
六部尚書改河北西路轉運使致仕元光二年卒

王晦字子明澤州高平人少負氣自意常慕張詠之為
人中明昌二年進士調長葛主簿有能聲察廉除遼
東路轉運司都勾判官提刑司舉其能轉北京轉運
戶籍判官遷安陽令累除簽陝西西路按察司事改
平涼治中召為少府少監遷戶部郎中貞祐初或舉
晦有將帥才俾募人自將得死士萬餘統之衛送通

州粟入中都有功遷霍王傅以部兵守順州攻牛欄山以解通州之圍遷翰林侍讀學士加勸農使九月順州受兵遣人突圍召滄景別部兵主者不肯發故部曲王臻請變計晦曰朝廷何負汝耶臻曰臻雖負國不忍負公因泣下晦叱曰吾年六十致位三品死則吾分詎從女耶將射之臻掩泣而去將士縋城出降晦被執不肯降遂就死愛將牛斗并見殺贈榮祿大夫樞密副使命有司立碑歲時致祭錄其子汝霖

為筆硯承奉

趙楠字庭幹高平人擢進士第天興元年為刑部郎中十一月右丞相延安郡忠正王布色端孫穆爾雅摩定國軍節度使納丹珠之子也與兄實勒們及護衛顏蓋宗阿同飲穆爾雅摩詐以事出投北兵尚書省令楠推其家屬及同飲人時上下迎合必欲以知情處之忙押門妻皆被訊掠其母完顏氏曰忙押門通其父妾父殺此妾忙押門不自安遂叛求脫命而已委曲

推問無知情狀省中微聞之召小吏郭從革諭以風旨從革言之楠方食擲匕筋於案大言曰寧使趙楠除名亦不能屈斷無辜人遂以不知情奏且以妾事上聞上曰丞相功臣納丹珠父子俱受國恩吾已保其不知情也立命赦出之人胥謂楠有于張風

張師穎高平人官震川均徭便民調解州沁陽令擢御史以明敏見稱授西京巡警使糾治畿輔人畏其嚴歷武寧軍節度使卒于官

路元高平人為省曹尚書郎五典郡事不畏強禦人以
路包拯呼之累遷河間按察轉運使

張國綱高平人外柔內剛事不避難為濮州刺史死於
王事

張翬高平人忠信碩大以能吏稱仕至臨潢路同知轉
運使

元

郝經字伯常澤州陵川人天挺之孫也金末避地魯山

居民匿窖中亂兵縱火經母許亦死經時九歲以蜜
和寒菹汁挾母齒飲之即蘇後徙順天晝則負薪米
養母夜則讀書嘗自誦曰不學無用學不讀非聖書
守帥張柔賈輔延之為上客憲宗二年世祖以太弟
開府金蓮川徵經入詔以治國安民之道與語大悅
遂留王府時憲宗入蜀命太弟統東師經從至濮上
言古之一天下者以德不以力宋今未有敗亡之釁
我乃空國而出諸侯窺伺於內小民凋敝於外經見

其危未見其利不如修德布惠結盟飭備以待西師
則上應天心下繫人望順時而動宋不足圖也會設
江淮荆湖南北路宣撫使命經為副先至江上宣布
恩信招納降附聞蜀師久無功進東師議及會兵渡
江圍鄂州聞合州討復進班師議會宋相賈似道密
遣使乞和迺班師明年世祖即位以經為翰林侍讀
學士充國信使使宋告即位且尋盟經入辭進立政
議時經有重名平章王文統忌之陰屬李壇潛師侵

宋欲假手害經經至濟南壇遺書止經經以壇書聞於朝行至宿州遣使請入國期不報時似道方冒鄂功恐經至泄其情遂以李壇為辭拘之真州經上表於宋曰願附魯連之義排難解紛豈如唐儉之徒歟兵誤國又數上書宋帝似道匿不以聞驛吏棘垣鑰戶經不為動從者四十騎居七年死過半經獨與六人處真州揚子院宋令伴使朱寶臣偽報元席捲北回經厲聲曰此事斷無有之當遣我輩還國又

九年丞相已延伐宋遣中都哈雅及經弟庸入宋問
執行人之罪宋懼遣總管段佑送經歸道病勅尚醫
近侍迎勞賞賚有差明年夏始詣闕入見秋卒謚文
忠經被留十六年鑄錮急迫益肆力於文章所撰有
易象春秋外傳續後漢書陵川文集共數百卷經還
之歲汴民射鴈金明池得繫帛詩云霜落風高恣所
如歸期回首是春初上林天子援弓繳窮海疊臣有
帛書後題中統十五年九月一日放鴈獲者勿殺國

信大使郝經書輟耕錄曰是時南北隔絕不知中統之改至元也帝聞之惻然曰四十騎留江南曾無一人鴈比者其後帛書存秘監

鄭鼎澤州陽城人幼讀書曉大義不妄言笑既長驍勇善騎射為澤潞遼沁千戶甲午從征蜀屢立戰功宋將燒棧道圍興元鼎修復之破宋兵解興元圍乙巳遷陽城縣軍民長官庚戌從憲宗征大理自六盤山下南蕃諸城抵雪山舍騎徒步嘗背負憲宗以行敵

金史卷一百二十一
據險鼎奮身力戰至金沙河上臨水傍危石立馬鼎
諫曰此非所宜親扶下馬攻大理城禽其王師還居
後道經吐蕃全軍而歸賜名伊克巴圖爾從世祖南攻
大勝關破之繼破臺山寨擒守將乘勝獨進陷淖伏
出鼎奮擊殺三人餘衆遁去南渡圍鄂州別攻興國
俱力戰中統元年以功遷平陽太原兩路萬戶二年
成鴈門關隘遷河東南北兩路宣撫使三年改平陽
太原宣慰使至元三年遷平陽路總管歲大旱下車

而雨導汾渠開鵬黃嶺道建橫澗橋修學校厲風俗
民德之十二年鎮黃州十四年改湖北道宣慰使移
鎮鄂州夏五月討蘄黃二州寇戰於樊口舟覆溺年
六十三贈中書丞謚忠毅加贈宣忠保節功臣平章
政事柱國追封潞國公謚忠肅

鄭制宜鼎子性聰敏莊重有器局通習國語至元十四
年襲父職戍鄂州攝府事十九年造樓船何家洲洲
地狹衆欲徙旁居民制宜改授寬地民德之城人多

姦或請捕制宜曰吾但嚴守備而已奈何濫及無辜
有數男子自城外至命縛入獄行省疑其非盜將釋
之不從次日復有乘白馬者來叱下訊之首伏罪一郡
帖然從征納延以功授懷遠大將軍樞密院判官遷
湖廣行省參知政事賜白金五千兩尋徵拜內臺侍
御史安西有牧地圍人奪民田十萬餘頃奉詔往訊
按國籍正之除湖廣行樞密副使昭賀二州及廬陵
境常被寇害制宜率偏師徇二州獲首賊及其黨殺

之盜賊屏息元貞元年授大都留守領少府監兼武
衛親軍都指揮使知屯田事成宗眷遇殊厚每侍宴
輒不敢飲屢賜內醞輒持以奉母特封母蘇氏為潞
國太夫人卒年四十七贈推忠贊治功臣銀青榮祿
大夫平章政事追封澤國公謚忠宣子阿爾斯蘭嗣
段直澤州人元初兵亂直倡義固守一方世祖命為本
州長官境內以寧復改建廟學陶育士類人多推重
之

張寶高平人中統間為永興路百戶適江寇為亂寶督
兵檄至即東擔以行時方元旦不少濡滯擒渠魁以
歸遷都指揮僉事居家孝親修建寧文館教里中子
弟

王傑澤州人雲州知州思忠子以廕補初授潞城縣主
簿延祐間為聞喜縣尹均賦興學以廉幹稱轉冀寧
路治中進階奉議大夫

賈魯字友恒高平人兩以明經領鄉貢泰定初授東平

路教授除太醫院都事召為宋史局官遷中書省檢
校上言八河倉淪沒官糧百三十萬斛其弊由富民
兼并貧民流亡宜先正經界俄拜監察御史首言封
事宜專達聖聰不宜臺臣先可否時論躋之已由山
北廉訪副使入為工部郎中至正四年河決特立行
都水監於鄆城以魯為太監魯循河道察地形往復
數千里備得要害為圖上二策其一議修築北堤以
制橫潰則用工省其一議疏塞並舉挽河使東行復

故道其工數倍會遷中書右司郎中議未竟尋調都漕運使條奏漕政八事一京畿和糴二優恤漕司舊領漕戶三接運委官四通州總治豫定委官五船戶困於壩夫海運壞於壩戶六疏濬運河七臨清運糧萬戶府當隸漕司八宣忠船戶宜付本司節制不果行既而托克托復相集廷臣議河防或言築堤或言疏南河遣工部尚書成遵行視終莫決魯昌言必塞北河使復故道役不大興害不能已復以前二策進丞

相取其後策與魯定議召入奏大稱旨十一年春命
為工部尚書總治河防使領河南北諸路軍民發汴
梁大名十三路民丁十五萬廬州等戍十八翼軍二
萬供役一切從事大小軍民官咸聽節度便宜興繕
仍命以兵鎮之自黃陵岡南達白茅放於黃固哈只
等口又自黃陵西至陽青村合於故道凡二百八十
里有竒自四月鳩工七月鑿河成乃塞決河九月每
楫通十一月諸埽堤成浚河復故道南匯於淮又東

入海召還朝以河平圖獻起授集賢大學士勅翰林
學士承旨歐陽元製河平碑以紀其績且宣付史館
元既為碑文又從魯訪問方略更質吏牘作至正河
防記略曰魯神色不動機解捷出進官吏工徒十餘
萬人日加獎諭辭旨懇至衆皆感激赴工又曰魯竭
其心思智計之巧乘其精神膽氣之壯不惜劬瘁不
畏浮言以報君相知人之明故作記俾後之任事者
知所取法云魯尋拜中書省左丞十三年從平徐州


托克托旋師命分攻濠州魯督戰誓師曰吾奉命統八
衛軍頓兵於濠七日矣爾諸將同心協力必以今日
取城池然後食急策馬麾進忽頭眩卒有旨護柩還
高平賜交鈔五百錠給葬事

楊公恕恭儉畏慎居官有能名仕至順天軍節度使副
使

宋翼以茂異舉初官永寧簿政肅刑簡至治二年擢翰
林學士改御史豪右斂跡諸所條陳多稱旨嘉納遷

淮西道廉訪使

鄭濤陽城人官河東宣慰司同知鎮澤州輕賦固圍民
賴以安



山西通志卷一百二十一